

Sombo'cho

Éxodo

Toya'caen tsu Moisésja Sombo'chove tevaen. Israel dutssiyedeccu Egiptoni can'jemba vana'jen'fa. Na'su tise'pama sombomboemba tise in'jan'cho manda'choma tevaemba tise'panga afe. Toya'caen tsu Chigaja tise a'i'ccu fae'ngae injancco'fa'choma ccase afapa Moisésma in'jaen tevaeñe cuintsu aindecu an'biañe aqqe'pasa'ne.

Israendeccu Egiptoni vana'jen'cho

1 ¹Vandeccu tsu Jacobi'ccu Egiptoni ji'cho israendecumbe inise. Nane poi'yi'cco tsu tise'pa pushe, tise'pa dushundecui'ccu Egiptoni ji'fa: ²Rubén, Simeón, Leví, Judá, ³Isacar, Zabulón, Benjamín, ⁴Dan, Neftalí, Gad toya'caen Aser. ⁵Tsa'caen ji'choma agattosi Jacob aindecuja setenta a'ive nepi, José tayo Egiptoni can'jen'choi'ccu.

⁶José, tise aindecu toya'caen poi'yi'cco tisia'caen fae'ngae coenzandeccu tsu pa'fa. ⁷Tsa'ma israendecuja tsain'bio dushundecuve an'biamba ñoa'me ti'tsse tsain'bitsse atapapa ti'tsse joccapitssia've da'fa. Nane tsa Egipto ande on'batsse tsu atapa'fa.

⁸Bo'tsse⁸ can'jensi omboe faesu cuna egipto'su na'su, tayopi'su Joséma atesumbi'choa, na'suve dapa tise aindecunga su: ⁹“Que can'faja, va Israel aindecuja tsain'bitssipa ingima ti'tsse osha'choma oshacho'fa. ¹⁰Tsa'cansi tsu injienge osha'ta tise'pama se'piye cuintsu ti'tsse atapambelyi can'faye. In'jamba'qqe gera jisi ingima iyiccayesundecui'ccu fae'ngae pipa ingi'ccu iyiccopa va ande'ye sombopa ja'fasa'ne.”

¹¹Tsa'caen in'jamba egiptondeccuja mandasundecuve ccutsiamba manda'fa cuintsu israendecuma aye'pa semambanganga ca'nia'faye. Tsa'caen ca'niamba manda'fa cuintsu Pitón canqqe toya'caen Ramsés canqqeve ñoña'faye. Nane egipto'su na'su faraóna tsu tsa canqqeve ñoña'faye manda

* 1.8 cuatrocientos canqqe'fa

tise an'bian'cho trigoma tseni boñañe. ¹²Tsa'ma tsa'caen vanae'fa'ni'qqe ti'tsse atapaji'fa. Atapaji'fasi poiye'cco egiptondeccuja ñoa'me dyo'fa.

¹³Tsa'caen dyopa egiptondeccuja israendecuma ñoa'me aiyepa sema'banga ca'nia'fa. ¹⁴Tsa'caen tsu tson'fa cuintu ñombi'ye'sui'ccu semamba apichama tssipoemba tsanga tsu'tsu chapiamba ladriyove ñoñafaye. Toya'caen pa'cco nasipa'su sema'banga'qqe tsu manda'fa. Tsa'caen tsu israendecuma quian'me semoemba ñoa'me vanae'fa. ¹⁵Toya'caen tsu egipto'su na'suja hebreo'su du'shuma isiansundeccu, Sifra toya'caen Fúanga, qqen afa:

¹⁶—Maqui a'ta hebreo'su pushesu, du'shuma isu'jesi ja'ta ñotsse in'janjan. Pushesuve isu'ninda antteja cuintu canseye. Tsa'ma tsandieve isu'ninda fi'ttija.

¹⁷Tsa'caen mandasi paña'an'qqe du'shuma isiansundeccuja Chigama dyoe'sui'ccu in'jamba egipto'su na'su mandaquua'caen tsombipa dushundeccuma fi'ttimbe'yi antte'fa cuintu canse'faye. ¹⁸Tsa'caen antte'je'fasi egipto'su na'suja tsendecuma ttu'sepa qqen su:

—¿Jongoesie qui tsandie du'shuma'qqe fi'ttimbe antte'je'fa?

¹⁹Tsonsi tsendecuja qqen su'fa:

—Hebreo'su pushesuja egipto'su pushesua'can'fambi. Nane ñoa'me quiñamba ingi toya nepimbi'te ai'yembe isu'je'fa.

²⁰⁻²¹Tsa'caen antte'je'fasi israendecuja ti'tsse atapa'ñaccapa ti'tsse osha'choma oshacho'fa. Toya'caen isiansundeccu dyoe'sui'ccu Chiga Quitsama in'jansi Chigaja tise'pama ñotsse tsoñe in'jamba antte cuintu tise'pa'qqe tsain'bio du'shuve atapa'faye. ²²Tsa'caen tson'jen'fasi faraónjan manda poiye'cco tise aindecuma qqen supa: “Hebreosundeccu tsandie du'shuve isu'ninda na'enga ttova cati'faja. Tsa'ma pushesu du'shuve isu'ninda antte'faja cuintu canseye.”

Moisésma isu'cho

2 ¹Leví aindecu'su tsandie tsa'su pushesuma pushe. ²Can'jensi dushundeccuve an'biamba ccase surie dapa tsandie du'shuve isu. Isupa cansi tsa du'shu me'detssisi attepa tres ccovu pa'cco a'tupa an'bian. ³Tsa'ma ti'tsse a'tupa an'biañe oshambipa naifa'su shoshovima otata'cho saparonga ppiña. Nane saparonga tsa'ccu ca'nisa'ne ñotsse ccoquuiamba tsanga du'shuma ppiñamba piccopa Nilo na'en utufa'su shoshovicunga ppiña dusian. ⁴Toya'caen tsa du'shumbe she'shema manda cuintu biacca ccutsupa caña'jeñe du'shuma mingae tson'fasa'ne.

⁵Omboe faraón onque'ngeja naeni onjoñe ande. Andepa tise onjon'jen'ni tisema coira'su pushesundeccuja na'en ofafa'ye pasia'je'fa. Tsa'caen pasia'je'fa'ni faraón onque'ngeja saparo shoshoviccuni duse'choma atte. Attepa manda tise'be sema'suma cuintu tsa saparoma i'ngaye. ⁶Isi saparoma fettapa atte tsani du'shu ppiapa inajen'choma. Attepa tsa du'shuma mendeyepa qqen su:

—Va tsu hebreondeccu'su tsandie du'shu.

7 Tsonsi tsa du'shumbe she'sheja sombopa faraón onque'ngema su:
—¿In'jambi ti qui ña japa hebreo'su pushesuma ttu'sengaye cuintsu jipa va du'shuma chochoemba coeñañe?

8 Tsonsi faraón onque'ngēja su:

—¡Japa ttusengaja!

Tsa'caen susi du'shumbe she'sheja tise mamani japa ttu'sepa i. 9 Isi faraón onque'ngēja su:

—Va du'shuma isupa ñambe coeñajan. Que tsa'caen coirapa coeñasi gi quenga afepoeña.

Tsa'caen susi du'shumbe chanjan angapa coeña. 10 Coeñamba faraón onque'ngenga afe. Afesi ñoa'me tise du'shuma'caen in'jamba Moisésve inisian “Na'en'suma somboen'cho” qqen suye.

Moisés Egipto ande'ye ccuya'cho

11 Moisésja ñoa'me coenza a'ive dapa tise antiandecuni pasia'su ja. Tsa'caen japa atte tise'pa sema'jen'choja ñoa'me a'ive'pave tson'jen'choma. Toya'caen tsu atte egipto'su a'i tise antian'su hebreoma ochha'chha'je'choma. 12 Attepa faesu a'i caña'jensa'ne tta'ttasi me'l'onsi tsa egipto'suma fi'tti. Fi'ttipa sisipanga a'tu.

13 Ccaqui a'ta ccase pasia'su ja. Tsa'caen japa dos hebreondeccu tisupanaccu iyicco'je'choma atte. Attepa faesuma ti'tsse noñangian'sunga catsepa inñajampaña:

—¿Jongoesie qui tisu faenga'suma tssetsse'je?

14 Tsa'caen susi tssetsse'suja su:

—¿Majan tsu quemajan ingi injama'choma somboen'su na'suve tson? ¿Ñama'qqe ti qui fi'ttiye in'jan egipto'suma fi'ttiquia'caen?

Tsama pañamba Moisésja ñoa'me dyo. Nane tse'i tsu in'jan tayo tise egipto'suma fi'tti'chove atesu'fa'choma. 15 Tsa'caen egipto'suma fi'tti'chove pañamba faraónjan manda cuintsu Moisésma tta'ttapa i'fasi fi'ttiye. Tsa'ma Moisésja tsene ccuyapa Madián andeni canseye ja. Tseni nepipa tsa'ccu poso jin'ttinga dyai.

16 Tseni canjen'su, Reuel, Madián ande'su Chigama afa'suja siete onque'ngeme an'bian. Tsequi a'ta tsendeccuja posoni ja'fa ovejama cuiña'jen'cho shavocunga tsa'ccuma on'boemba tise yaya ovejama cui'ñañe. 17 Tsa'ma faesu ovejama coirasundeccu'qqe jipa tsendeccuma posone se'pipa joqqitssian'fa. Tsa'caen se'pi'fasi Moisésja jangipa ccane'qqe tsendeccuma joqqitssian moemba pushesundeccu i'cho ovejama cui'ña. 18 Pushesundeccu toequi tise yayani ja'fasi tise'pa yayaja inñajampaña:

—¿Ma'camba qui ja'ñojan jundeyi ji'fa?

19 Tsendeccuja su'fa:

—Fae egipto'su a'i tsu faesu oveja coirasundeccuma joqqitssiamba ingimbe o'tie tsa'ccuma somboemba ovejama cui'ña.

20 Tsa'caen su'fasi Reuelja su:

—¿Mani tsu tsa tsandieja can'jen? ¿Jongoesie qui tisuveyi catipa ji'fa? Japa ttusenga'faja cuintsu jipa aña.

²¹Tsa'caen tsonsi tsu Moisésja tsa Reuel ettini canseye ashaen. Can'jensi Reuelja tise onque'nge, Séforama, Moisés pusheve antte. ²²Pushesi can'jemba tsandie du'shuve isusi Moisésja tisema inisian Gersón, “Ñanda gi faesu andene jipa faesu andeni can'jen'cho” qqquen suye.

²³Tsa'caen jasi can'jemba egipto'su na'suja pa. Israendeccuja ñoa'me vana'jemba ñombi'yepa fundo'je'fa tise'pa sema'suve tsangae ca'ni'choma asi'ttaemba. Tsa'caen ina'jen'fa'choma Chigaja pañamba ²⁴tise tayopi Abraham, Isaac toya'caen Jacobi'ccu injancco'fa'choma in'jan. ²⁵Nane Chiga Quitsaja israendeccu vana'jen'choma atepa tise'pama ñotsse in'jamba fuitete ashaen.

Chiga Moisésma ttu'se'cho

3 ¹Moisésja tise quitsa ccashe'ye Jetro ovejandecuma coira'je. Nane Jetro tsu Madián'su Chigama afa'su (tise faesu inise Reuel). Tsa'caen coira'jepa biani a'i menia angapa fae a'ta tsu Horeb ccotta'cconga nepi. Tsa ccotta'cco tsu Chiga can'jen'cho ccotta'cco. ²Tse'ttinga tsu Chigama sefacconi'su shondo'suja quini'si si'ngeve anchandasi Moisésnga attian. Moisésja tsama ñotsse cambia in'jan quini'sija si'ngeve anchanda'ma ñoa'me ju'rumbi. ³Tsa'cansi atepa in'jan: “¿Jongoesupa tsu ccaninga'o? Japa gi caña micomba tsu quini'sija ju'rumbi.”

⁴Na'su Chigaja tsa'caen Moisés cañe in'jamba catse ji'choma atepa tsa quini'si'ye afapa su:

—¡Moisés! ¡Moisés!

Pañamba Moisésja su:

—Va'tti gi can'jen.

⁵Tsa'caen susi Chigaja su:

—Vani catsejama. Que sapatoma shichhaja. Va'tti que ccutsu'ttija Chiga ande tsu.

⁶Toya'caen tsu su:

—Ña gi que coenzandeccu'yembe Chiga, nane Abraham, Isaac toya'caen Jacobmbe Chiga.

Tsa'caen susi Moisésja cambia'juma picco Chigama cañe dyojopa.

⁷Tsa'ma Na'su Chigaja ti'tsse afapa su:

—A'tatsse gi atte ña aindecu Egiptoni vana'jen'fa'choma. Toya'caen gi paña tise'pa ñombi'yepa fundo'je'choma semoesundeccu tise'pama vanae'jen'fasi. Ñoa'metsse gi atesu tise'pa ñombi'ye'je'choma. ⁸Tsa'camba gi vani ande egiptondecu tson'jen'choma itsapa ccushaeñe. Nane tsa ande'ye gi israendeccuma somboemba ñotssia rande andenga angaya. Tseni tsu chocho toya'caen tuño cuñajun'cho'qqe shacaya'bi. Tsa ande tsu cananeo, hitita, amorreo, ferezeo, heveo toya'caen jubuseondeccu canse'cho ande. ⁹Que canjan, paña gi israendeccu ñombi'yepa fundo'je'choma. Toya'caen gi atte egiptondecu tise'pama tsain'bitsse egae tson'jen'choma. ¹⁰Tsa'cansi, que jaja. Quema gi moeña faraónja japa Egipto ande'ye ña aindecuma, tsa israendeccuma somboeñe.

¹¹Tsa'caen susi Moisésja Chiganga su:

—¿Majaña gi ña faraónja japa Egipto ande'ye israendecuma somboeña?

¹²Tsa'caen susi Chigaja su:

—Ña gi quei'ccu can'jeña. Toya'caen va canjen'chota tsu ñoa'me ñotsse canjaemba quema manda'cho: Maqui a'ta queja, ña aindecuma Egipto'ye somboen'da qui que'i poi'cco va'ttinga jipa ñama inñajan'faya.

¹³Tsa'ma Moisésja ccase afapa su:

—Ña israendecunga japa: 'Tsa que'i coenzandecumbe Chiga tsu ñama que'ini moe' qquen ña susi tsendeccu: '¿Jongoesu inise tsu?' qquen inñajampaña'ninda ¿jongoesu qquen gi suya?

¹⁴Inñajampañasi Chigaja su:

—ÑA GI ÑOA'ME ÑA. Toya'caen israendecungata qui suya: 'Tsa ÑA GI qquen su'cho tsu que'ini ñama moe.'

¹⁵Toya'caen Chigaja Moisésnga su:

—Toya'caen israendecungaja qquen suja: 'Na'su Chiga Quitsa que'i tayopi'su coenzandecumbe Chiga, nane Abraham, Isaac toya'caen Jacobmbe Chiga tsu que'ini ñama moe.' Tsangae tsu tsa ña iniseja jinchoya. Nane tsangae tsu a'ija tsesu qquen ñama injan'jen'faya. ¹⁶Japa israe'su coenzandecuma boñamba qquen condaja: 'Na'su Chiga Quitsa que'i tayopi'su coenzandecumbe Chiga, nane Abraham, Isaac, toya'caen Jacobmbe Chiga tsu ñanga attiamba qquen su: Que'ima injan'jemba gi egiptondecu que'ima ma'caen tson'jen'choma atte. ¹⁷Toya'caen tsu su: Egiptondecu vanae'jen'cho'ye gi somboemba cananeo, hitita, amorreo, ferezeo, heveo toya'caen jebuseondeccu can'jen'cho andeni angaya. Tsa andeni tsu chocho toya'caen tuño cuñajun'cho'qqe shacaya'mbi.'

¹⁸Tsa'caen susi tsu coenzandeccu quema pañamba quei'ccu fae'ngae egipto'su na'sunga ja'faya. Tsa'caen japa qui na'sunga qquen suya: 'Na'su Chiga Quitsa, tsa hebreondecumbe Chiga tsu inginga cachian. Tsa'caen cachiansi gi in'jan'fa ingima antteja tres a'ta pa'cco a'li menia japa oque oraemba ingi Na'su Chiga Quitsanga afeye.' ¹⁹Tsa'ma tsa'caen su'ni'qqe egipto'su na'suja tisema mingae dyoñambi'ninda que'i somboye antteya'bi'choa've qquen gi in'jan. ²⁰Tsane'da gi ña oshacho'choma canjaemba egiptosundecuma dyoñaña osha'cho egave daqqe'sui'ccu tise'pama inñaccaemba. Tsa'caen tsonsi tsu faraónjan que'ima somboeña. ²¹Toya'caen gi egiptondecunga tsoña cuintsu israendeccu sombo'je'ninda ñotsse cambia moe'faye. Tsa'caen cambia moesi tsu me'cco jambeyi osha'choma anga'faya. ²²Nane poi pushesundeccu tsu tise'pai'ccu pporotsse canjen'su toya'caen tise'pai'ccu fae'ngae canjen'suma'qqe osha'chove inñajan'faya: corima ñoña'cho, totoacorima ñoña'cho toya'caen ondiccuque'su sarupave'qqe. Tsai'ccu qui que'i dushundecuma ondiquian'faya. Tsa'caen tsomba qui egiptondecuma me'ccoe cati ja'faya.

4 ¹Na'su Chiga tsa'caen susi Moisésja su:
—Aindeccuja ñama paña'faya'bi ni ña su'choma in'jan'faya'bi.
Tsa'camba tsu ñama su'faya 'Na'su Chigaja quenga attiambi.'

²Tsonsi Chigaja iñajampaña:

—¿Jongoesuma qui que tiveni an'bian?

Moisésja su:

—Accuicco'choma.

³Na'su Chigaja su:

—Andenga ttova ccuiñajan.

Tsa'caen mandasi Moisés andenga ttova ccuiñasi tse'faei'ccuyi accuicco'choja iyove da. Tsa'caen dasi Moisésja dyopa butto joqqitssi.

⁴Tsa'ma Na'su Chigaja su:

—Tivema yasapa atsefa'ye indija.

Moisés tivel'ccu indisi tsa iyoja ccase accuicco'chove da.

⁵Tsonsi Na'suja su:

—Voe gi canjaen cuintsu Na'su, tise'pa tayopi'su coenzandecumbe Chiga, nane Abraham, Isaac toya'caen Jacobmbe Chiga, quenga attian qquen in'jan'faye. ⁶Toya'caen ja'ñojan que tivema tsomijan que ondiccu'je tso'singa.

Tsa'caen susi pañamba Moisés tisu tivema tsomimba somboensi tise tiveja na congomba paque'sunga setsapa tototsse chandisu'ccoacantsse da. ⁷Tsonsi Chigaja su:

—Ccase que tivema tsomijan.

Moisés tsa'caen tsomba somboensi ccase cuname da pa'cco tise ai'voa'cantsse. ⁸Tsa'caen tsonsi Na'suja su:

—Nane o'tie canjaen'choma in'jambipa quema pañambi'ta sepacoe canjen'choma tsu pañamba in'jan'faya. ⁹Tsa'ma va dos canjen'choma in'jambipa quema paña'fambian'da na'en'su tsa'ccuma ichhoipa andenga zaiñajan. Tsa na'en'su tsa'ccuma zaiñasi andenga japa tsu anjampave daya.

¹⁰Chiga tsa'caen canjaensi Moisésja su:

—Chigáne Na'su, ñajan minguite'qqe tsa'caen ñotsse afaye jinchombi. Ni ja'ño queja ña, quema shondo'sui'ccu afasi gi jongoe qquen suya'chove atesumbi.

¹¹Moisés tsa'caen susi Na'su Chigaja su:

—¿Majan tsu a'inga aya'fave antte? ¿Majan tsu tson fae'cco tsosinambive faesu ayafambive? ¿Majan tsu tson fae'cco atte'je'chove faesu binime? ¿Ñambi ti gi? ¹²Tsa'cansi junde jaja. Ña gi quei'ccu can'jemba quema afaen'jeña que ma'caen suya'chove.

¹³Moisésja ccase afapa su:

—Chigáne Na'su, faesu a'ima moejan.

¹⁴Tsa'caen susi Na'su Chigaja Moisésma iyicca'yepa su:

—¿An'biambi'a ti qui que quindyá Aarón tsa levíta'suma? In'jan gi tise tsu ñotsse afaye atesu. Toya'caen tsu tiseja jiña quema cachuiye. Cachuiya tsu ñoa'me avujaya. ¹⁵Tisenga condaseja pa'cco ma'caen suya'choma. Ñajan

tisei'ccu quei'ccu'qqe gi can'jemba afaen'jeña. Toya'caen gi que'i ma'caen tsoña'chove condal'jeya. ¹⁶Queta qui ña afaquua'caen Aarón'ga condaya. Toya'caen Aarón'jan que su'choma tsu a'inga condaya. ¹⁷Va accuicco'choma angaja. Tsai'ccu qui osha'cho egave daqqe'suve canjaen'faya.

Moisés toequi Egiptoni ja'cho

¹⁸Tsa'caen susi pañamba Moisés'ja tise quitsa ccashe'ye Jetro tsaoni jipa su: —Toequi Egiptoni jaye gi in'jan ña antiandecuma can'su. Atesuye gi in'jan tise'pa toya canse'chove.

Jetroja su:

—Ñotsse japa can'gaja.

¹⁹Nane Moisés toya Madián andeni can'jen'ni Na'su Chigaja su:

—Toequi jaja Egiptoni. Tayo tsu pa'fa quema fi'ttiye in'jan'chondeccu.

²⁰Tsa'caen susi paña'chopa Moisés'ja tise pushe, toya'caen tise dushundecuma boronga dyañamba toequi Egiptoni ja. Toya'caen Chiga accuicco'choma'qqe isupa anga. ²¹Omboe Na'su Chigaja ccase Moisés'ma su:

—Egiptoni nepi'ta ñotsse in'jamba ña quenga canjaen'choma faraón'ga canjaenjan. Tsa'ma ña gi tise injama'choma ta'etsse tsoña cuintsu israendeccu somboye anttembe cañe. ²²Tsonsi qui faraón'ga qqen suya:

'Qquen tsu Na'su Chigaja su: Israendeccu tsu ña dutssi'ye coenza'can'fa.

²³Tayo gi su: Antteja cuintsu ña dutssi'ye sombopa ñama in'ajan'ga'faye.

Tsa'ma tise'pa somboye anttembiya'da gi que dutssi'ye coenzama fi'ttiya.'

²⁷Tsa'caen supa Egiptoni can'jen'cho Aarón'ga Chigaja su: "A'i menia japa Moisés'ma cachuija." Tsa'caen susi Aarón'jan Chiga can'jen'cho ccottacconi japa Moisés'ma cachuipa mochapa chigambian. ²⁸Tsonsi Moisés'ja pa'cco Na'su Chiga tise afaya'chove manda'choma Aarón'ga condase. Toya'caen osha'chove Chiga canjaeñe manda'choma'qqe condase. ²⁹Tsa'caen condasepa fae'ngae Egiptoni japa israe'su coenzandecuma boñamba

³⁰Aarón'jan pa'cco ma'caen Na'su Chiga Moisés'nga su'choma condase. Toya'caen tsu osha'cho Chiga mandasi canjaen'choma a'inga canjaen'fa.

³¹Tsama pañamba aindecuaja ñotsse in'jan'fa. Na'su Chiga tise'pama injan'jemba tise'pa vana'jen'choma attesi puntssamba Chigama in'ajan'fa.

Moisés, Aarón faraón'ga afa'cho

5 ¹Tsa'caen condase nanimba Moisés toya'caen Aarón'ga faraón'ga japa qqen su'fa:

—Qquen tsu israendeccumbe Na'su Chigaja su: 'Antteja cuintsu ña aindecu a'i menia japa ñane fiestaen'faye.'

²Tsa'ma faraón'jan pañamba su:

—¿Majan tsu tsa 'Na'su Chiga' ña tisema pañamba israendeccu jaye antteye? Nane atesumbi gi tsa na'suve, ni antteya'bi gi cuintsu israendeccu sombopa ja'faye.

³Tsonsi Moisés toya'caen Aarónjan su'fa:

—Na'su Chiga Quitsa, tsa hebreondeccumbe Chiga tsu inginga cachian. Tsa'caen cachiansi gi tres a'ta pa'cco a'i menia jayi'fa oque oraemba ingi Na'su Chiga Quitsanga afeye in'jamba'qqe osha'cho paqqe'sui'ccu tsambi'ta matichi'ccu ingima fi'ttiya'chove manda anttesa'ne.

⁴Tsa'ma egipto'su na'suja su:

—Moisés, Aarón, ¿jongoesie qui tisia'caen aindeccu sema'jen'chonga jipa qqeña'jen'fa? ¡Japa sema'jenga'faja!

⁵Toya'caen tsu faraónjan su:

—¿Ja'ñojan tsain'bio israendeccu va andeni can'jensi ti qui tise'pa sema'bama anttiañe in'jan'fa?

⁶Tsequi a'tayi tsu faraónjan semoeñe mandasundeccu toya'caen semoen'su israendeccuma'qqe qqen manda antte:

7—Ja'ñojan shoshovima israendeccunga afe'fájama apichanga echho'chhoemba tise'pa ladriyove ñoñañe que'i tayoe afe'jequia'caen. Antte'faja cuintsu tise'payi shoshovive tta'ttapa ñoña'faye. ⁸Tsa'ma tayoe mañi'cco ladriyove nani'jenquia'caen cuintsu ja'ño'qqe nani'jen'faye manda'faja; ni fae'cco'qqe shacambitse nani'jeña'chove. Nane ñoa'me noe'supa tsu qqen fundo'je'fa: '¡Ingi Chiganga oque oraemba afeye gi jayi'fa!' ⁹Va aindeccuma ti'tsse quian'me semoen'faja. Semambaniñi an'bian'faja cuintsu afopoencambe can'faye.

¹⁰Tsama pañamba semoeñe mandasundeccu toya'caen semoen'su israendeccu'qqe sombopa japa aindeccunga su'fa:

—Faraónnda tsu ingima su ccase que'inga shoshovima afe'jembe can'faye.

¹¹Ja'ñojan que'iyi qui japa taiye osha'fa manima atte'ta. Tsa'ma tsa'caen tson'jen'an'qqe tayoe mañi ladriyove nanijenquia'caen tsu naniña'cho.

¹²Tsama pañamba israendeccuja attufaccopa pa'cco Egipto andenga jaja'fa nasipa caticcu'su shoshovima tta'ttapa apichanga echho'chhoemba ladriyove ñoñañe. ¹³⁻¹⁴Poi a'ta tsu faraón mandasi semoeñe mandasundeccuja manda'je'fa cuintsu tise'pa shoshovima afe'jeite mañi'cco ladriyove nanijenquia'caen nani'faye. Toya'caen tsu semoen'su israendeccuma ochha'chhapa qqen su'fa:

—¿Micomba qui cani ni ja'ño'qqe toya nani'fambi que'i tayoe tson'jenquia'can'tsse ladriyove?

¹⁵Tsa'caen tise'pama ochha'chhasi semoen'su israendeccuja faraónja japa i'namba afapa qqen su'fa:

—¿Jongoesie qui ingi quembe semoesundeccuma tsa'caen tsincon'faye manda? ¹⁶Ja'ñonda tsu shoshovima afe'jembi'ma '¡Ladriyove ñoñajan!' qqen manda. Toya'caen qui ingima ochha'chha'faye manda. ¡Que aindeccu tsu ñoa'me shacapa'fa!

¹⁷Tsa'ma faraónjan su:

—¡Que'ija noe'su! ¡Ñoa'me noe'su'fa qui! Tsa'camba qui Na'su Chiganga oque oraemba afe'su jaye qqen a'fa'fa. ¹⁸¡Japa sema'ga'faja!

Mapán shoshovima afe'je'fambi'ni'qqe que'i tayoe mañi'cco ladriyove nanijenqquia'caen tsu nani'faya'cho.

¹⁹Tsa'caen tayoe ladriyove nanijenqquia'caen tsu nani'faya'cho qquen susi semoen'su israendeccuja ñoa'me osha'masia sema'ba qquen in'jan'fa.

²⁰Tsa'caen in'jamba faraón tsa'o'ye sombopa Moisés toya'caen Aarónma cachui'fa tise'pave rondasundecuma. ²¹Tsomba su'fa:

—Cuintu Na'su Chiga que'i ingima tson'choma atepa que'i injama'choma somboenjan. Nane que'i qui shacapa'fa faraón toya'caen tise mandasi semoeñe mandasundeccu'qqe ingima chi'ga'fa'chone. Que'iyi qui tson'fa tise'pa ingima sema'moen cansepa sefaen'faya'chove.

Moisés Chigama ñajan'cho

²²Tsa'caen su'fasi Moisésja Na'su Chigama ñajamba su:

—Na'su Chiga, ¿Jongoesie qui va aindecuma tsa'caen egae tson? ¿Jongoesie qui ñama vani moe? ²³Nane tseyi ña jipa faraónja que mandasi afa'choma afasi tsu ti'tsse que aindecuma vanae'jen. Tsa'ma queja mingae'qqe tsomba tsa vanasundecuma ccushaembi.

6 ¹Tsama pañamba Na'su Chigaja su:

—Ja'ño qui ateya ña faraónja tsoña'choma. Nane jo'su vanae'choi'ccuyi tsu anteya cuintu que'i tise ande'ye sombo'faye. Toya'caen tsa'caen vanamba tsu tise'yi que'ima tteya moeña.

7 ⁴Faraónja tsu que'i su'choma pañaña'bi. Tsa'ma ña gi pa'cco ña oshacho'choma Egipto andenga ttova shequianqquia'caen canjeña. Nane ñoa'me egae daque'sui'ccu gi egiptondeccuma dyoñamba ña sundarondeccuma somboeña, tsa Israel ña aindecuma. ⁵Tsa'caen ña oshacho'choma Egiptoni canjaemba, israendecuma somboensi tsu ñama Ñoa'me Na'su qquen egiptondeccuja in'jan'faya.

⁶Moisés toya'caen Aarónjan pa'cco ma'caen Na'su tise'pama mandaqquia'caen tsu tson'fa. ⁷Tsa'caen faraón'ccu afajei'te Moisésja ochenta canque'fave an'bian. Toya'caen Aarónjan ochenta y tres canque'fave an'bian.

Aarón accuicco'cho

⁸Na'su Chigaja Moisésnga Aarónja'qqe su:

⁹—Faraón canjaen'chove que'ima ñajan'ninda Aarónma suja cuintu tise accuicco'choma isupa faraón dyai'tti'su andenga ttova ccuiñañe cuintu iyove daye.

¹⁰Tsa'caen susi pañamba Moisés toya'caen Aarón faraóni japa Na'su Chiga tise'pama mandaqquia'caen tson'fa. Aarón tise accuicco'choma faraón toya'caen tisema shondosundeccu cañal'jen'ttinga ttova ccuiñañi tsa accuicco'choja iyove da. ¹¹Tsa'caen tsonsi atepa faraónjan manda cuintu tise atesu'cho injama'pandeqquia toya'caen tise mágicondecuma'qqe ttusengaye. Tsendeccu jipa tise'pa mágicoi'ccu tsa'caeñi tson'fa. ¹²Nane

poiyl'cco tsendeccu tise'pa accuicco'choma andenga ttova ccuiñasi iyove da'fa. Tsa'ma Aarón iyove da'cho accuicco'cho tsu tsendeccumbe iyoma poiyl'ccoma an. ¹³Tsa'caen tsonsi atepa faraónjan iyicca'yepa ñoa'me se'pipa tise'pa su'choma pañañe in'jambi, Na'su Chiga ma'caen suqquia'caen.

Pa'cco anjampaveyi da'cho

¹⁴Omboe Na'su Chigaja Moisésnga su:

—Faraónnda tsu ñoa'me iyicca'yepa se'pi cuintsu israendeccu sombombe'yi can'faye. ¹⁵Tsa'ma tu'lja sinte'yi japa ronda'jeja na'en otafari tise andesi atteye. Tsa accuicco'cho iyove da'je'choma angaja. ¹⁶Cachuipa qui qquen suya: 'Tsa Na'su Chiga, hebreondeccumbe Chiga tsu ñama moe quenga qquen suye: Antteja cuintsu ña aindeccu japa a'i menia ñama ñajan'faye. Tsa'ma vama'qqe que pañambian'da ¹⁷qquen tsu Na'su Chigaja su: ¡Ja'ño qui ñama atteya ñajan ñoa'me Na'suve! Na'su tsa'caen susi ña tiveni isu'cho accuicco'choi'ccu na'en'su tsa'ccunga ochhaisi tsu pa'cco tsa'ccu anjampaveyi daya. ¹⁸Tsa'caen dasi tsu avu'qqe pa'faya. Toya'caen na'en'qqe tssu'jutsse dasi poiyl'cco egiptondeccu tsa'su tsa'ccuma cui'ye chi'ga'faya.'

¹⁹Toya'caen tsu Na'su Chigaja Moisésnga su:

—Toya'caen Aarónma mandaja cuintsu tise accuicco'choma isupa tise tivema yasaye egipto'su na'en, nai'qui, singu'ccu toya'caen ma'ttini tsa'ccuma ccutsian'chonga cuintsu pa'cco anjampaveyi daye. Nane poi tasa majan quini'ccoma ñoña'cho toya'caen majan patuma ñoña'chonga'qqe anjampayi tsu ccutsuya.

²⁰Moisés toya'caen Aarón tsu Na'su Chiga mandaqquia'caen tson'fa. Aarónjan tise accuicco'choma isupa faraón toya'caen tisema shondosundeccu caña'jen'ni na'en'su tsa'ccuma ochhaisi pa'cco tsa'ccu anjampaveyi da. ²¹Tsa'caen dasi tsu poi avu pa'fa. Toya'caen na'en'qqe tssu'jutsse dasi egiptondeccuja tsa'su tsa'ccuma cui'ye osha'fambi. ¡Nane pa'cco Egipto ande'su tsa'ccu tsu anjampaveyi da!

²²Tsa'ma Egipto'su mágicondeccu'qqe tsa'caeñi tson'fa tise'pa mágicoi'ccu. Tsa'caen tson'fasi faraónjan ñoa'me iyicca'yepa se'pipa Moisés toya'caen Aarón su'choma pañañe in'jambi Na'su Chiga ma'caen suqquia'caen. ²³Faraónjan tsane mingae'qqe asit'eaembe'yi tisu tsaoni ja. ²⁴Toya'caen poiyl'cco egiptondeccu tsu na'en otafama posove dyan'dyaya'cho cuintsu giya'tssia tsa'ccu somboye. Nane na'en'su tsa'ccumajan cui'ye osha'fambi.

Pa'cco sapoveyi da'cho

²⁵Na'su Chigaja na'ema ochhai'cho siete a'ta pasasi

8 ¹tsu Na'suja Moisésnga qquen su:
—Ccase faraónja japa qquen suja: 'Qquen tsu Na'su Chigaja quema su: Antteja cuintsu ña aindeccu japa ñama ñajan'faye. ²Nane tise'pa jaye anttembiya'da gi sapoi'ccu pa'cco que andema vanaeña.

³Pa'cco na'en tsu sapoveyi goa'ttisi tsa'ye sombopa que tsa'onga ca'ni'faya. Ca'nimba tsu que anambaccuni, que ana'jen'chonga, quema shondosundecumbe tsa'onga, que aindecu tsa'onga toya'caen quembe panma mandy!'je'cho shavoccu, quembe panme matsan'jencunga'qqe ca'ni'faya. ⁴Nane sapoyi tsu buttotto'o shequeya que'ye, quema shondosundeccu'ye toya'caen poi'cco que aindecu'ye'qqe.'

⁵Ccase tsu Na'su Chigaja Moisésnga su:

—Aarónma mandaja tise accuicco'choma isupa tivema yasaye poi na'enga, poi nai'qui, singu'ccunga'qqe cuintsu tsa'ye sapoyi sombopa pa'cco Egipto andenga on'baye.

⁶Tsa'caen mandasi Aarón poi Egipto'su na'enga yasasi tsa'ye sombopa pa'cco andenga sapoyi on'ba. ⁷Tsa'ma egipto'su mágicondecu'qqe tise'pa mágicoi'ccu tsa'caeni tsomba pa'cco egipto andenga sapoveyi i'fa. ⁸Tsama attepa faraónjan Moisés toya'caen Aarónme ttu'senga'faye manda. Tise'pa jisi qquen su:

—Na'su Chigama ñajan'faja cuintsu ña'ñe toya'caen ña aindecu'ye sapoma joqqitssiañe. Tsa'caen tsonsi gi que aindecuma antteya cuintsu japa Na'su Chiganga oque oraemba afe'faye.

⁹Tsama pañamba Moisésja su:

—Ñanga condaja minga'ni ña quene, quema shondosundecune toya'caen que aindecune'qqe ñajañe qui in'jan cuintsu sapo que'ye toya'caen que tsa'o'ye joqqitssisi jo'su na'emeñi can'jeñe. ¹⁰Tsonsi faraónjan su:

—Tu'iyi ñajaña'chove gi in'jan.

Tsonsi Moisésja su:

—Tsa'caen tsu tsoña faesu ingi Na'su Chiga'can'me me'l'on qquen que in'jañe.

¹¹Pa'cco sapo tsu que tsa'o'ye jasi jo'su na'emeñi can'jeñe. Ti'tsseja quema, ni quema shondosundecuma, ni que aindecuma noñangian'jeña'bi tsu.

¹²Tsa'caen supa Moisés toya'caen Aarón faraón tsa'o'ye sombopa ja'fa. Japa Moisésja Na'su Chigama ñajan cuintsu tise faraónja moe'cho sapoma joqqitssiañe. ¹³Moisés ñajansi Na'su Chiga tsa'caen tsonsi pa'cco sapo tsaoni sheque'cho, atandunduni sheque'cho toya'caen nasipani sheque'cho'qqe pa'cco pa'fa. ¹⁴Tsa'caen pa'fasi aindecu taipa boña'fasi pa'cco ande tssu'jutsse da. ¹⁵Tsa'ma tsa'caen tise vana'jen'choma vuiquiansi faraónjan ccase iyicca'yepa se'pipa Moisés toya'caen Aarón su'choma pañañe in'jambi ma'caen Na'su Chiga suqquia'caen.

Pa'cco ocuveyi da'cho

¹⁶Na'su Chigaja ccase Moisésnga su:

—Aarónma mandaja tise accuicco'choma isupa tsai'ccu ande'su sisipama ochhaiye cuintsu tsa'ye pa'cco Egipto andenga ocuveyi daye.

¹⁷Tsa'caen tsu tson'fa. Aarón tise accuicco'choi'ccu ande'su sisipama ochhaisi pa'cco egipto'su sisipaja ocuve dapa poi'cco aindecu toya'caen tise'pa aiña'chondeccuma'qqe sutsa'je'fa. ¹⁸Tsonsi mágicondecu'qqe

tise'pa mágicoi'ccu tsa'caen tson qqen tson'ma osha'fambi. Tsa'caen tson'jen'fa'ni toya tsu ocuja poi aindecuma toya'caen aiña'choma'qqe sutsa'je'fa. ¹⁹Tsa'caen dasi mágicondecuja faraónga su'fa:

—Vata tsu Chiga tson'cho.

Tsa'ma faraónjan iyicca'yepa se'pipa tsa'caen tson'choma in'jambi ma'caen Na'su Chiga suquia'caen.

Pa'cco tenquen'choveyi da'cho

²⁰Na'su Chiga ccase Moisésnga su:

—Tu'ita tsu faraónjan sinte'yi naeni andeya. Tsa'cansi toya cose'yi jangipa japa ronda'jepa qqen suja: 'Qquen tsu Na'su Chigaja quema su: Antteja cuintsu ña aindecu japa ñama in'ajan'faye. ²¹Nane tise'pa jaye que anttembiya'da gi quenga, quema shondosundecunga, que aindecunga toya'caen pa'cco tise'pa tsa'onga'qqe tenquen'choveyi moeña. Poi egiptondecumbe tsa'onga tsu tenquen'choyi on'baya. Pa'cco ande'qqe tsu tenquen'choveyi daya. ²²Tsa'ma tsa'caen da'je'ni'qqe ña aindecu can'jen'cho Gosén andenijan ni fae tenquen'choyi'qqe jaya'bi. Tsa'caen tsonsi qui in'jaña ñajan Na'su Chiga va andeni can'jen'chove. ²³Nane ña aindecuja que aindecquia'cambi qqen canjeñe gi tsa'caen tsoña. Tu'i gi tsa'caen tsoña.'

²⁴Ccaqui a'ta Na'su Chiga tise suquia'caen tsonsi tenquen'cho'ja unjimba'ccoacan'tsse jipa faraón tsa'onga ca'ni. Toya'caen tisema shondosundecumbe tsa'onga, nane pa'cco Egipto andenga tsa'caen da. Tenquen'choja tsa'caen bopa pa'cco andema da'ño.

²⁵Tsonsi faraónjan Moisés toya'caen Aarónme ttu'senga'faye manda. Tise'pa jisi qqen su:

—Japa que'i Chiganga oque oraemba afeja. Tsa'ma va ande'ye sombombe'yi can'faja.

²⁶Tsa'caen susi Moisésja su:

—Ingi tsa'caen tsoñe'jan ñotssimbi tsu. Nane ingi fi'ttipa, Na'su, ingi Chiganga afe'je'chota tsu egiptondecu chiga qqen injan'jen'cho. Tsa'cansi ingi tsa tise'pa chiga qqen injan'jen'choma fi'ttipa, Na'su, ingi Chiganga afesi atte'ta tsu egiptondecu iyicca'yepa ingima patui'ccu ttoval'coen fi'tti'faya qqen gi in'jan. ²⁷Tsa'cansi tsu tres a'ta pa'cco a'i menia japa tseni fi'ttipa oque oraemba ingi Na'su Chiganga afeya'cho tise suquia'caen.

²⁸Tsa'caen susi faraónjan su:

—Antteya gi que'i a'i menia japa Na'su que'i Chiganga oque oraemba afe'faye. Tsa'ma in'jambi gi que'i panshaen biani ja'faye. Toya'caen ñane'qqe que'i Chigama in'ajan'faja.

²⁹Tsa'ma Moisésja su:

—Ñoa'me sombopa jayipa gi Na'su Chigama in'ajaña cuintsu tu'ija que'ye, quema shondosundecuy'e toya'caen que aindecuy'e'qqe

tenqquen'choma joqqitssiañe. Tsa'ma aquia israendeccu, Na'su tise'pa Chiganga oque oraemba afe'faye moeña'caen afopoen tsinconjama.

³⁰Tsa'caen supa Moisés faraón tsa'o'ye sombopa japa Na'su Chigama ñajansi ³¹Chigaja Moisés ñajanquia'caen tson. Nane tenqquen'choma tsu joqqitssian faraón'ñe, tise ma shondosundeccu'ye toya'caen tise aindeccu'ye'qqe. Nane ni fae tenqquen'choyi'qqe jinchombitssi. ³²Tsa'ma tsa'caen joqqitssiansi faraónjan ccase iyicca'yepa se'pipa israendeccu jaya'chove anttembi.

Pa'cco egipto'su aiña'cho pa'cho

9 ¹Tsa'caen tsonsi Na'su Chigaja ccase Moisésnga su:
—Faraónja japa qqen suja: 'Qquen tsu Na'su, hebreondeccumbe Chigaja, quema su: Antteja ña aindecuma cuintu japa ñama ñajan'faye. ²Tise'pa jaye anttembipa toyayi que sepi'je'ninda ³Na'su Chiga tsu tise oshacho'choma canjaemba que'i potroni can'jen'cho aiña'choma ega paqqe'sui'ccu da'ñoña. Nane tsa'caen tsonsi tsu que'i cavayo, boro, cameyo, vaura, toya'caen oveja'qqe pa'faya. ⁴Tsa'ma israendeccuja egiptosundequiacan'fambisi tsu Na'su Chigaja israe'su aiña'chondeccuma ante cuintu fae'ccoyi'qqe pambe can'faye.'

⁵Toya'caen tsu Na'su Chigaja maqui tise tsoña'choma condapa su:
—Tu'i gi tsa'caen tsoña.

⁶Ccaqui a'ta Na'su Chiga tise suquia'caen tsonsi pa'cco egipto'su aiña'cho pa'fa. Tsa'ma israendeccumbeja ni fae'ccoyi'qqe pambitssi. ⁷Tsama pañamba faraónjan manda cuintu israendeccu aiña'choma japa can'ga'faye. Tsa'caen can'gapa tsu in'jan'fa ñoa'metsse fae'ccoyi'qqe pambi'choa've. Tsa'caen atte'ma ti'tsse iyicca'yepa se'pipa israendeccu jaye anttembi.

Egiptondeccu ccomenzufave da'cho

⁸Tsonsi Na'su Chigaja Moisés toya'caen Aarónja su:

—Panme matssan'jen'cho'su cusepama pafu isupa faraóni jaja'faja. Tseni japa tsu Moisésja faraónja ccutsupa sefaningae cusepama gainaña'cho. ⁹Gaiñasi tsa cusepa tsu vuvutsse dapa pa'cco tsa Egipto andenga japa pa'cco ccomenzufave atapaya. Tsonsi tsu aindeccu toya'caen pa'cco egipto'su aiña'cho'qqe ccomenzufa'faya.

¹⁰Tsama pañamba Moisés toya'caen Aarón panme matssan'jen'cho'su cusepama pafu isupa faraóni ja'fa. Tseni nepipa Moisésja tsa cusepama sefaningae gaina. Tsa'caen gainasi aindeccu toya'caen tise'pa aiña'chondeccu'qqe ccomenzufaveyi da'fa. ¹¹Tsa'caen tsonsi mágicondeccu'qqe Moisésnga catsepa tsa'caen tsoñe osha'fambi, nane tise'pa'qqe egiptondecupa tayo ccomenzufapa'fa. ¹²Tsa'ma Na'su Chiga faraónma in'jaensi iyicca'yepa se'pipa Moisés toya'caen Aarón su'choma pañambi ma'caen Moisésnga Na'su Chiga suquia'caen.

Tsandapandaqui amppi'cho

¹³Tsonsi Na'su Chigaja Moisésnga su:

—Tu'ija sinte'yi jangipa japa faraónga suja: 'Qquen tsu Na'su Chiga tsa hebreondeccumbe Chigaja quema su: Antteja ña aindecuma cuintu japa ñama iñajan'faye. ¹⁴Nane ja'ñonda gi pa'cco ña vanaeque'suma quenga, quema shondosundecunga toya'caen que aindecunga'qqe moeña. Tsa'caen tsonsi qui in'jan'faya majañi'qqe ña'can va andeni can'jembi'choave. ¹⁵Nane pa'cco ña oshacho'choma canjaen'choecan'da qui tayo que, toya'caen que aindecu'qqe ega paqqe'sunga sefa'faye'can. ¹⁶Tsa'ma tsa'caen tsoñe in'jambipa gi antte cuintu que'i toya cansepa ña oshacho'choma attepa vana'jensi poi ande'su aindecu pañamba ñajan osha'choma oshacho qqen in'jan'faye. ¹⁷Tsa'camba qui tsa'caen tson'ni'qqe toya sepi'je ña aindecuma moeñe. ¹⁸Que'i tsa'caen in'jan'ninda gi tu'ija qquia'ni mandaya cuintu rande tsandapandaqui amppi'faye. Nane tseyi Egipto andeve ashaente ja'ñoa'ngae tsa'cantssi tsandapandaqui amppimbi. ¹⁹Tsa'cansi poi'yi'ccoma mandaja cuintu osha'cho tise'pa aiña'cho potreroni can'jen'choma ipa ettinga ca'nia'faye. Tsambi'ta tsu tsandapandaqui amppipa poi'yi'cco a'i toya'caen tise'pa aiña'cho tsoneni can'jen'choma fitti'ttiya.'

²⁰Tsa'caen Na'su Chiga susi pañamba dyopa majan faraónma shondosundecuja tise'pambe semasundeccu toya'caen tise'pa aiña'choma'qqe tsa'onga ca'nia'fa. ²¹Tsa'ma majandecuja ñoa'me su'cho qqen in'jambipa injanga tsoneni an'bian'fa. ²²Tsonsi Na'su Chiga Moisésnga su:

—Que tivema Chiga sefacconingae yasaja cuintu pa'cco Egipto andeni poi aindecunga, poi aiña'chonga toya'caen poi nasipanga'qqe tsandapandaqui amppiye.

²³Tsa'caen mandasi Moisésja tise tivema sefacconingae yasasi Na'su Chigaja tsandama afaen. Nane tsanda veyamba afasi tsandapandaqui pa'cco Egipto andenga amppi'fa. ²⁴Tsandapandaqui tsa'caen amppi'jesi tsanda'qqe veyamba oque'je. Nane tseyi Egipto andeve ashaente ja'ñoa'ngae tsa'cantssi tsandapandaqui amppipa cansembi. ²⁵Tsa'caen tsu tsandapandaqui pa'cco egipto andeni osha'cho jinchoma metsse sefaen. Nane aindecu, tise'pa aiña'cho toya'caen pa'cco tise'pa nasipama'qqe metsse sefaen. Tsa'caen pa'cco tsa ande'su quini'jima ucca'sho sefaen. ²⁶Mapán tsa'caen da'je'ni'qqe israendeccu can'jen'cho Gosén andenijan ni fae tsandapandaqui'qqe amppimbi.

²⁷Tsonsi faraónjan Moisés toya'caen Aarónme ttu'senga'faye manda. Tise'pa jisi qqen su:

—In'jan gi ña egae tsincon'choma. Nane ña, toya'caen ña aindecu gi shacapa'fa. Na'su Chigaja shacapambi tsu. ²⁸Panshaen tsu tsanda toya'caen tsandapandaqui ingima vanae'jen. Tsa'cansi gi ti'tsse que'ima sepi'jeye in'jambi. Nane Na'su Chigama ingine iñajansi gi que'i jaye antteya.

²⁹Tsonsi Moisésja su:

—Pan va canqqe'ye sombopa japa gi ña tivema sefaningae yasapa Na'su Chigama ñajaña. Tsonsi tsu tsandapandaquima pasaemba tsandama'qqe pasaña cuintu que'i pa'cco va andeja Na'su Chigambe qqen in'jan'faye. ³⁰Tsa'ma ñanda gi atesu ni que toya'caen quema shondosundeccu'qqe toya qui Na'su Chiga Quitsama dyo'fambi.

³¹Tsandapandaqui tsa'caen amppipa tsu lino sarupave ñoñaqqe'su shoshovi toya'caen cebada panme ñoñaqqe'su shoshovima metsse chapian cati. Nane cebadaja tayo na'jen'cho toya'caen lino tayo teta'je'cho tsu tsa'caen sefa. ³²Tsa'ma trigo toya'caen panme ñoñaqqe'su centenojan mingae dambe'yi pasa jai'ngae sho'yo'chopa.

³³Faraón'ccu afa nanimba Moisésja tsa canqqe'ye sombopa tise tivema Na'su Chiganga yasapa ñajan. Tse'faei'ccuyi tsandapandaqui, unjin toya'caen tsanda'qqe ziya. ³⁴Tsa'ma faraónjan tsa'caen unjin, tsandapandaqui toya'caen tsanda'qqe pasasi atepa ccase egae tsincoñe ashaen. Nane jo'su tise'yi se'pipa iyicca'yembi tsa'ma tise ma shondosundeccu'qqe tsa'caen iyicca'ye'fa. ³⁵Faraónjan tsa'caen se'pipa iyicca'yepa israendeccu jaye anttembi ma'caen Na'su Chiga tayoe Moisésnga suquiqua'caen.

Pa'cco Egiptoni ttombueyi da'cho

10 ¹Tsa'caen tson pasapa Na'su Chigaja Moisésnga su:
—Japa faraónma can'gaja. Nane ña gi tson cuintu tise toya'caen tise ma shondosundeccu'qqe iyicca'yepa se'pisi tise'panga osha'cho ña oshacho'choma canjaeñe. ²Toya'caen que'qqe qui que dushundecunga que du'shumbe dushundecunga'qqe ña pa'cco Egipto andenga tson'cho toya'caen canjaen'choma condaseya. Tsomba qui ñajan ñoa'me Na'su Chiga qqen in'jan'faya.

³Tsa'caen susi pañamba Moisés toya'caen Aarón faraóni japa qqen su'fa:
—Qquen tsu Na'su Chiga tsa hebreondecumbe Chigaja quema su: '¿Minga'ni qui ñama utu'cco've da qqen in'jaña? Antteja cuintu ña aindecu japa ñama ñajan'faye. ⁴Nane que tise'pama moeñe ti'tsse sepi'je'ninda gi tu'lja pa'cco que andenga ttombuma moeña. ⁵Tsa ttombu pa'cco andema pi'cco'tsse bosi qui andeve atteye osha'faya'bi. Nane tsendeccu tsu tsandapandaqui amppite dañongembe pasa'cho re'riccoama metsse an sefaemba pa'cco quini'ljima'qqe an sefaen'faya. ⁶Pa'cco que tsa'onga quema shondosundecumbe tsa'onga toya'caen poi egiptondecumbe tsa'onga'qqe tsu ttombuyi on'baya. Nane minga'ni'qqe que yayandeccu, que yaya ccasheyendeccu'qqe tsa'cantssia'ma atepa pa'fambi.'

Tsa'caen afa nanimba Moisésja piyipa faraón tsa'o'ye sombopa ja. ⁷Tsonsi faraónma shondosundeccuja faraónga qqen su'fa:

—¿Mi'ng'e' qui tsa a'i'ccu iyiccopani canseye in'jan? Antteja, Ti'tsse'tssia, cuintu tise aindecui'ccu japa Na'su tise'pa Chigama ñajan'faye. Ti'tsse'tssia, ¿injiengemitssi ti qui pa'cco egiptoni jincho'cho dañongepa sefaji'ni'qqe?

⁸Tsonsi faraónjan ccase Moisés toya'caen Aarónme ttu'senga'faye manda. Tise'pa jisi qqen su:

—Japa que'i Na'su Chigama ññajan'ga'faja. Tsa'ma toya jambite ñanga condaja majan majan qui ja'faya.

⁹Moisés pañamba su:

—Nane ingi dushundeccu, coenzandeccu, dutssiyendeccu, onquengendeccu toya'caen ingi oveja, vaura'qqe tsu ja'faya'cho. Ingene'ja Na'su Chigane randeve fiestaña'cho tsu.

¹⁰Tsa'ma faraónjan su:

—¡Tayo gi atesu que egae in'jamba tson'jen'choma! ¿Que'i Na'su Chiga que'i'ccu fae'ngae jacamba fuitaya qqen ti qui in'jan? Toya'caen ¿que'i poiye'cco tisupa dushundeccui'ccu jaye ña antteya qqen ti qui in'jan?

¹¹Nane tsa'caen tsoñe antteya'bi gi. Ñoa'me que'i Na'su Chiganga ññajañe in'jan'da jo'su tsandienaccuyi japa ññajan'ga'faja.

Tsa'caen supa faraónjan manda cuintsu Moisés toya'caen Aarónma tise dyai'ttie joqqitssian'faye. ¹²Tsa'caen joqqitssian'fasi Na'su Chigaja Moisésnga su:

—Que tivema pa'cco egipto'su andenga yasaja cuintsu ttombu jipa tsandapandaqui dañoite dañongembeyi pasa'cho jomba'choma an sefaen'faye.

¹³Tsama pañamba Moisés tise tivema Egipto andenga yasasi Na'su Chigaja chiga sombo'jeni'su fingiama moesi quian'me fingiamba ji pa'cco a'ta toya'caen pa'cco cose. Ccaqui a'ta chiga sombo'jeni'su fingian ttombuma i. ¹⁴Tsa ttombu tsu pa'cco andenga ca'ni'fa. Minguite'qqe ni minga'ni'qqe tsa'cantssi ttombu ca'nimba canse'fambi. ¹⁵Nane pa'cco andema pi'cco'tsse jisi andema atteye oshambi. Tsa'cantsse jipa pa'cco jomba'choma amba tsandapandaqui dañoite dañongembe pasa'cho quini'jin'su teta'choma'qqe an sefaen'fa. Ni faeje'ccoyi'qqe inzia ccaqueje Egipto andeni antteyembi. Nasipa'su toya'caen quini'jin'su'qqe inzia ccaqueje jinchombi.

¹⁶Tsonsi faraónjan uta'tsseyi Moisés toya'caen Aarónme ttu'senga'faye manda. Tise'pa jisi qqen su:

—Ñoa'me gi que'i Na'su Chiganga toya'caen que'inga'qqe egae tsincon. ¹⁷Tsa'camba gi ññajan ja'ñoñi'qqe ña egae tsincon'chone aqqe'papa ñane Na'su Chigama ññajan'faja cuintsu va tsangae fi'ttiqqe'su paqqe'suma ña'ñe joqqitssiañe.

¹⁸Tsa'caen susi Moisésja faraón tsa'o'ye sombopa japa Na'su Chigama ññajan. ¹⁹Ññajansi pañamba Na'su Chigaja chiga amppi'jeni'su fingiama moesi quian'me jipa pa'cco ttombuma Cu'a marnga maña. Ni fae ttombuyi'qqe Egipto andeni catiyembi. ²⁰Tsa'ma Na'su Chiga faraónma in'jaensi iyicca'yepa se'pipa israendeccu jaya'chove anttembi.

Pa'cco ande si'en da'cho

²¹Tsonsi Na'su Chigaja Moisésnga su:

—Que tivema sefacconingae yasaja cuintsu pa'cco Egipto andenga ñoa'me sintsse dasi aindeccuja vasescamba ja'je'faye.

²²Tsa'caen mandasi Moisés tise tivema sefaningae yasasi pa'cco Egipto andenga sintsse da. ²³Nane tsa'caen dasi tres a'ta pa'cco majañi'qqe tisupapora atteye osha'fambi ni ccani jacañe'qqe osha'fambi. Mapán tsa'caen da'je'ni'qqe poi'yi'cco israendecumbe tsaonijan a'tatsse jincho.

²⁴Tsonsi faraónjan Moisésve ttu'senga'faye manda. Tise jisi qquen su:

—Que'i dushundecui'ccu japa que'i Na'su Chiganga iñajan'faja. Tsa'ma que'i oveja, que'i vaurama'qqe vani catija'faja.

²⁵Tsa'ma Moisésja su:

—Isha, tsa'ma que'qqe que'i aiña'choma inginga afeya'cho cuintsu tsama ingi oque oraemba Na'su ingi Chiganga afeye. ²⁶Toya'caen pa'cco ingi aiña'cho ingi'ccu tsu jaya'cho. Ni fae'ccoyi'qqe tsu vani catiyeya'bi. Nane tsendeccu'suma gi indipa oque oraen'jen'faya'cho Na'su Chigama iñajañe. Toya tseni jambipa gi jongoesuma Na'su Chiganga afeya'chove atesu'fambi.

²⁷Tsa'ma Na'su Chiga faraónma in'jaensi iyicca'yepa se'pipa israendeccu jaya'chove anttembi. ²⁸Toya'caen faraónjan Moisésnga su:

—Junde va'ttie sombopa japa ccase ñama can'su ji'jembe canjan. Nane maqui a'ta ñani ccase ji'ta qui paya.

²⁹Tsonsi Moisésja su:

—Ñotsse qui su. Ccase can'su ji'jeya'bi gi.

Aisheve isu'chondeccu paya'cho

11 ¹Tsa'ma toya sombo'fambi'te Na'su Chigaja Moisésnga qquen su: —Ccase gi faesu pa'qqe'suma faraónja toya'caen poi'yi'cco egiptondeccunga moeña. Tsa'caen tsonsi faraónjan que'i tisupatsse jaye anttembi'ma tise'yi tsu que'ima va ande'ye tteya moeña. ²Tsa'ma ja'ño israendecuma mandaja tsandiendeccu, pushesundeccu'qqe cuintsu tise'pai'ccu pporotsse canjen'su tsandiendecuma toya'caen pushesundecuma'qqe cori, totoacorima ñoña'choma iñajan'faye.

³(Nane Na'su Chiga egiptondeccuma in'jaensi tsendeccuja israendecuma ñoa'me ñotsse in'jan'fa. Toya'caen faraónma shondosundeccu, poi'yi'cco egipto'su aindeccu'qqe Moisésja tise'pama ti'tsse joccapitssia qquen in'jan'fa.)

⁴Tsa'caen su'chosi Moisésja faraónja su:

—Na'su Chigaja qquen tsu quema su: 'Enttinge cose gi pa'cco Egipto andengae panshaña. ⁵Tsonsi tsu poi'yi'cco egiptondeccu aisheve isu'chondeccu pa'faya. Nane faraón na'su dyaipa'chonga dyai'sumbe dutssi'ye coenza toya'caen sunda'choma shoquendian'su sema'su pushesumbe du'shu coenza'qqe fae'ngae pa'faya. Toya'caen tsu tise'pa aiña'cho aisheve isu'cho'qqe pa'cco pa'faya.

⁶Pa'cco Egipto ande'ye tsu i'namba fundo'je'faya. Minguite'qqe tsa'can'ma paña'fambi qui ni minga'ni'qqe qui ccase paña'faya'bi.' ⁷Mapán tsa'caen da'je'ni'qqe israendecunijan, ainjan shendya'jepa i'na'faya'bi a'i ni tise'pa

aiña'cho'qqe. Tsa'caen tsu Na'su Chigaja canjaeña cuintsu israendeccuja egiptosundequiacan'fambi qqen in'jan'faye. ⁸Tsa'caen dasi tsu poiyl'cco quema shondosundeccu jipa ccaru dyaipa ñama inñajamba su'faya: '¡Junde que, toya'caen que aindecu'ccu jaja'faja!' Tsa'caen susi gi ja'faya.

Tsomba Moisésja ñoa'me iyicca'yepa faraón dyai'ttie sombopa ja. ⁹Tsonsi Na'su Chigaja Moisésnga su:

—Faraónjan que'i su'choma in'jaña'bi tsu. Tsa'caen tson'chone tsu ña canjaen'choja ti'tsse atapaya pa'cco Egipto andenga.

¹⁰Moisés toya'caen Aarón osha'cho canjaen'choma faraónnga tsa'caen canjaen'fa'ni'qqe Na'su Chiga tisema in'jaensi iyicca'yepa se'pipa israendeccu Egipto ande'ye somboya'chove anttembi.

Chiga fi'ttimbe panshan'cho (Pascua)

12 ¹Na'su Chigaja egiptoni Moisés toya'caen Aarónnga afapa qqen su: ²“Va ccovu tsu que'ineja me'ttia'ye ashaen'cho ccovu. Vai'ccu qui canque'fave agatto'faya. ³Poiyl'cco israendecuma ttu'sepa qqen condaja: ‘Va ccovu'su diez a'tangae tsu poiyl'cco que'i tisupa tsa'o'sui'ccu oveja du'shuma tsambi'ta chivo du'shuma indiya'cho. ⁴Fae tsa'o'su re'riccopa pa'cco ovejama año oshambi'ta tsu faesu tsa'o'sui'ccu fae'ngae bopa an'faya'cho. Nane a'ima agattopa tisupa ma'caen año in'janquua'caen tsu attufaeña'cho. ⁵Majan oveja quitsa'ye du'shu fae canque'fave an'bian'cho, egave me'choama tsu indiya'cho. Tsa'caen oveja me'chota tsu chivo du'shuma indiya'cho. ⁶Indipa tsu coirapa an'biaña'cho cuatro a'tave. Tsequi a'ta sime tsu poiyl'cco israendeccu tise'pa indipa an'bian'choma fi'tti'faya'cho. ⁷Tsa'caen fi'ttipa tsu tsa'su anjampai'ccu tisupa an'cho'su tsa'ombe sombo'tti'su utufa toya'caen ombafa'fama'qqe onjoeña'cho. ⁸Tsequi cose tsu año'choma matssamba, anque'su ccaqueje inzatsia toya'caen cupana'cco me'choa panma an'faya'cho. ⁹Tsa'ma año'cho cunanatssia ni tsa'ccui'ccu sho'ccoemba an'fajama. Nane pa'ccoma si'ngenga matssamba, tsove, tsu'tte toya'caen tise tto'pama'qqe tsu matssaña'cho. ¹⁰Toya'caen ccaqui a'tane antte'fajama. Tsa'ma anttey'ninda pa'ccoma tsu oqueya'cho. ¹¹Toya'caen que'i ondiccujema ondiccupa que'i sapatoma ejiamba que'i accuicco'choma isupa tsu tsa año'choma favatsse año'cho. Nane tsa tsu Chiga fi'ttimbe panshan'cho cose. ¹²Tsequi cose gi pa'cco Egipto andengae panshamba poiyl'cco egipto'su aisheve isu'cho tsandiendecuma toya'caen tise'pa aiña'cho aisheve isu'chondeccuma'qqe fitti'ttiya. Tsa'caen gi poi Egiptombe chigandecuma patsuya. Ña Na'su Chiga gi tsa'caen su.

¹³“Tsa anjampata tsu canjaeña que'i ma'tti can'jen'chove ña atesuye. Tsa'caen tson'fasi gi egiptondecuma fittiti'jepa tsa anjampama atte'ta tse'ttima panshaña. Tsa'cansi qui fae'ccoyi'qqe que'i'suja pa'faya'bi. ¹⁴Ña tsa'caen tson'choma injan'jamba qui tsesu ccovu nepi'ninda rande fiestave ñane

tson'faya'cho. Tsa'caen que'i tson'chota tsu tsangae jinchoya. Que'i omba'su dushundeccu'qqe cuintu injan'jemba tsa'caen tson'jen'faya'chove. ¹⁵Siete a'tangae fiestaemba tsu cupana'cco me'choa panmeñi an'jen'faya'cho. Nane tsa fiesta ashaenquiyei tsu que'i tsaoni an'bian'cho cupana'ccoma metsse catiya'cho. Majan tsa siete a'ta cupana'ccopa panma an'jen'ninda tsu Israel aindeccu'ye tisema joqqitssian'cho. ¹⁶Toya'caen aishe a'ta, septimo a'ta'qqe tsu poiye'cco a'i Chiganga bo'faya'cho. Tsequi a'taja sema'ma'quia a'ta tsu. Nane jo'su que'i anqqe'suveyi tsu ñoñamba faesuve ti'tsse sema'masia. ¹⁷Cupana'cco me'choa pan fiesta tsu poi canqqe'fa fiestaen'jeña'cho. Nane tsesu a'ta gi ñajan que'i poiye'ccoma Egipto'ye somboen. Tsangae tsu tsa'caen fiestaen'jeña'cho, que'i, toya'caen que'i omba'su dushundeccu'qqe cuintu injan'jemba tsa'caen tson'jen'faya'chove. ¹⁸Nane primer ccovu, a'ta catorce qui sime tsesu panma año ashaemba tsa ccovu'su a'ta veinte y uno qui si'metsse tsesuveyi an'jen'faya'cho. ¹⁹Tsa siete a'ta tsu que'i tsaoni cupana'ccove an'bian'masia. Nane majan, israe'su, tsambi'ta que'i'ccu canjen'su israembindeqquia, cupana'ccopa panma an'jen'ninda tsu Israel aindeccu'ye tisema joqqitssiaña'cho. ²⁰Nane osha'cho jongoesu cupana'cco'ccu tson'choja an'masia tsu. Mani japa can'jen'an'qqe qui cupana'cco me'choa panma an'jen'faya'cho.' ”

²¹Tsa'caen pañamba Moisésja israe'su coenzandecuma ttu'se boñamba su: “Japa que'i ettisundecumbe oveja tsambi'ta chivoma indipa fi'tti'faja Chiga panshan'cho a'tama panshaeñe. ²²Anjampama bandejanga boñamba canttini'cco tosema tsanga tssipoemba tsa'o sombo'tti'su utufa toya'caen ombafa'fama'qqe onjoen'faja. Ni fae'cco'yi'qqe tisupa etti'ye toya a'tambite sombo'fajama. ²³Tsa'caen tson'fasi tsu Na'su Chigaja egiptondecuma fittitti'jepa sombo'tti'su utufa toya'caen ombafa'fa'su onjoen'choma atte'ta tsa ettima anttepa panshaña. Tsayita tsu Na'su Chigaja se'piya tsa fi'tti'su que'i tsa'onga ca'nisa'ne. ²⁴Va tson'choma que'l'qqe injan'jensi tsu que'i omba'su dushundeccu'qqe tsangae injan'jen'faya. ²⁵Mapán tayopi Na'su Chiga que'inga afeye su'cho andeni japa canse'a'qqe qui tsa'caen injan'jen'faya'cho. ²⁶Que'i dushundeccu ‘Va tson'choja ¿jongoesune tsu injenge?’ qqen iñajampaña'fa'ninda ²⁷qqen conda'faja: ‘Va año'chota tsu Na'su Chiga tson'chone injenge'cho año'cho. Nane tayopi tise egiptondecuma fitti'ttiye jacamba israendeccu Egiptoni can'jen'cho tsa'oma panshan. Tsa'caen panshamba ingi tayopi'su aindecuma ccushaen'choma injan'jeñe injenge'cho año'cho tsu.’ ”

Tsama pañamba israendeccuja puntssamba Na'su Chigama ñotsse afapa ²⁸japa Na'su Chiga Moisés toya'caen Aaróna mandaqquia'caen tson'fa.

Aisheve isu'chondeccu pa'cho

²⁹Tsomba tse'i enttinge cose Na'su Chigaja egiptosundeccu aisheve isu'chondeccuma fitti'tti. Nane faraón, na'su dyaipa'chonga dyai'sumbe dutssi'ye coenza toya'caen indiyepa can'jen'chombe dutssi'ye coenza tsu

fae'ngae pa'fa. Toya'caen tsu tise'pa aiña'cho aisheve isu'chondeccu'qqe pa'cco pa'fa. ³⁰Tsa'caen dasi faraón tise'ma shondosundeccu toya'caen poiye'cco egiptondeccu cose jangipa quian'me pa'cco Egipto'ye i'na'fa. Ni fae ettiyi'qqe a'i pa'chove me'i'ombi. ³¹Tsequi cose'yi faraónjan manda cuintsu Moisés toya'caen Aarónma ttu'sepa qqen condaye:

—¡Ja'faja! Joqqitssi'faja ña aindeccu'ye que'i poiye'cco israendeccu'ccu. Japa que'i suqquia'caen Na'su Chigama ñajan'faja.

³²Toya'caen que'i oveja, que'i vaurama'qqe que'i in'janquia'caen angapa ja'faja. Japa ñane'qqe Chigama ñajan'faja.

³³Egiptondeccuja cunshoa'me israendeccuma manda'fa cuintsu tise'pa ande'ye junde sombopa ja'faye. Nane poiye'cco tsa'caen paye tson'jen'fa qqen in'jamba tsa'caen manda'fa. ³⁴Tsonsi israendeccuja tise'pa ñoña'cho cupana'cco me'choa pan, mandyi'je'cho shavoccuni ccutsu'choma, injanga tise'pa sarupai'ccu onccamba opipa jaye ashaen'fa. ³⁵Toya'caen Moisés mandaquia'caen poiye'cco egiptondeccuma cori, totoacorima ñoña'cho toya'caen sarupave'qqe ñajan'fa. ³⁶Ñajan'fasi Na'su Chigaja egiptondeccuma in'jaen cuintsu se'pimbe'yi israendeccu ñajan'choma afe'faye. Israendeccu tsa'caen tsonsi tsu egiptondeccuja me'cco catiye'fa.

Israendeccu Egipto'ye sombo'cho

³⁷Israendeccuja Ramsés canquene sombopa Sucotni ja'fa. Nane pushesu, du'shuma'qqe agattombe'yi jo'su coenza tsandiendeccuveyi agattosi tsu seisciento mil a'i'fa. ³⁸Tsendeccu'ccu tsu tsain'bitssia a'i faesu aindeccu'qqe jaja'fa. Toya'caen tsain'bitssi oveja tsain'bitssi vaura tsu fae'ngae ja'fa. ³⁹Egiptondeccu cunshoa'me mandasi sombopa japa toya anque'suma aquiambe'yi ja'fa. Tsa'camba tse'ttinga nepipa tise'pa egiptone i'cho toya cunama pan cupana'cco me'choave matssan'fa.

⁴⁰Israendeccuja cuatro ciento treinta canque'fave Egipto andeni canse'fa. ⁴¹Nane tsa'caen cuatro ciento treinta canque'fave nepi'cho a'ta tsu poiye'cco israendeccu tsain'bitsse atapa'chondeccuja Na'su Chiga sundarondeccuma tsa ande'ye sombo'fa. ⁴²Tsequi cose Na'su Chiga tise'pama coirapa Egipto ande'ye somboen'choma injan'jamba tsu israendeccuja poi canque'fa tsesu a'ta nepi'ninda ccane'qqe tsa a'tama coiraquia'caen fiestaen'jeña'cho.

Unjimba'cco, si'nge anga'cho

13 ¹⁷Tsa'caen faraón israendeccu jaya'chove anttesi Chigaja Filisteo andeni, tsa tansintsse Canaán andeni jaya'cho tsaiqui'ye, angambi. Nane in'jamba'qqe israendeccu Filisteo sundarondeccuma atepa dyopa toe Egipto andeni shanda'fasa'ne. ¹⁸Tsa'caen in'jamba ccaru'ye a'i menia'su tsaiqui'ye angapa Cu'a marni nepian.

Israendeccuja Egipto'ye sombopa osha'cho iyiccoqqe'sui'ccu sundaroacan'tsse bopa ja'fa. ¹⁹Toya'caen Moisésja José'ye tsu'ttama

anga. Nane José'ye toya cansuite tsu ñajan cuintsu Israel dutssiyendeccu ñoa'metsse su'choi'ccu tise tsu'ttama tsa'caen angaye su'faya'chove. Tsa'caen ñajamba su: “Ñoa'me gi su, Chiga jipa tsu futeya. Tsa'caen ashaensi jayi'ta ña tsu'ttama'qqe somboemba anga'faya'cho.”

²⁰Israendeccuja Sucotne sombopa Etamni nepipa tse'ttinga ana'fa. Tse'tti tsu a'i meniame da'tti. ²¹Poi a'ta tsu Na'su Chigaja unjimba'ccoi'ccu fuitepa canjaen'jen maningae ja'faya'chove. Toya'caen coseta tsu si'ngei'ccu sefane chanjiemba canjaen'jen. Tsa'caen canjaensi pa'cco a'ta pa'cco cose'qqe jaye osha'fa. ²²Nane pa'cco a'ta tsu tsa unjimba'ccoja tise'pama o'tie jayi. Toya'caen pa'cco cose tsa si'nge'qqe tise'pama o'tie jayi.

Israendeccu Cu'a Marma ise'cho

14 ¹Na'su Chigaja ccase afapa Moisésnga su: ²“Israendeccum condaja cuintsu toequi japa Pihahirots isevetsse ana'faye. Nane Pihahirots tsu Baal-zefón isevetsse Migdolma panshamba mar jin'tti. Tseni nepipa tsu mar jin'ttinga ñoñamba ana'faya'cho. ³Tsa'caen tson'fasi tsu faraónjan qqen in'jaña: ‘Israendeccuja maningae jaya'chove atesumbipa qqepa a'i menia jacan'fa.’ ⁴Tsa'ma ña gi faraónma in'jaeña cuintsu iyicca'yepa que'ima mandiañe. Tsónsi gi ña oshacho'choma tisei'ccu toya'caen tise sundarondeccu'ccu canjaeña. Tse'i tsu egiptondeccuja ñamajan Na'su Chiga qqen in'jan'faya.”

Tsama pañamba israendeccuja tsa'caen tson'fa. ⁵Tsa'caen tson'jen'fa'ni egipto'su na'sunga conda'fa israendeccu ccuyapa ja'choma. Pañamba faraón toya'caen tisema shondosundeccu'qqe asi'ttaemba ccaningae in'jamba qqen su'fa: “¿Jongoesu qqen in'jamba gi antte'fa cuintsu israendeccu ingi'be sema'jen'choma anttepa tsa'caen ja'faye?”

⁶Tse'faei'ccuyi faraónjan manda cuintsu tise cavayo qquitssasi geraen'jen'cho caroma junde ñoña'faye. Ñoña'fasi tise sundarondeccum anga. ⁷Nane seisciento caro ñotssia, toya'caen pa'cco Egipto ande'su caroma'qqe anga. Poi caronga tsu sundaro nasundeccuja ja'fa. ⁸Tsa'caen Na'su Chiga in'jaensi tsu faraónjan iyicca'yepa israendeccum mandian. Mapán Na'su Chiga tisu oshacho'choi'ccu israendeccum somboe'ni'qqe tsu faraónjan toya iyicca'yepa mandian.

⁹Egiptondeccuja pa'cco tise'pa sundaro, tise'pa caro, tise'pa cavayoi'ccu sombopa israendeccum mandian'fa. Tsa'caen mandiamba mar otafa Pihahirots jin'tti tsa Baalzefón isevetsse anamba can'jen'fa'choma atte'fa. ¹⁰Israendeccuja tsa'caen egiptondeccu catseji'fa'choma attepa ñoa'me dyopa Na'su Chigama ñajan'fa cuintsu tise'pama futeye. ¹¹Tsomba Moisésnga su'fa:

—¿Egipto andeninda ti atu'ttve me'i'on que tsene ingima somboensi jipa va a'i menia'ni paye? ¿Jongoesie qui ingima tsa'caen tsincon? ¿Jongoesie qui ingima Egiptone somboen? ¹²Queña'si gi toya Egipto andeni can'jemba quenga su'fa: ‘Antteja Egiptondeccumbe ingi sema'jeñe. A'i menia pa'choma bove ñotssi tsu Egipto andeni tsangae sema'suve dapa canse'faye.’

¹³Tsa'ma Moisésja tise'panga su:

—Dyombe can'faja. Notsse in'jamba caña'jen'faja Na'su Chiga que'ima ccushaëña'choma. Nane minga'ni'qqe qui ja'ño que'i atte'cho egiptondeccuma ccase atte'faya'bi. ¹⁴Que'ija asi'ttaembe can'faja cuintsu Na'su Chigayi que'ine iyiccoye.

¹⁵Tsonsi Na'su Chigaja Moisésnga su:

—¿Jongoesie qui ña fuiteya'chove ññajan? Mandaja cuintsu poiyyi'cco israendeccu quema o'tie ja'faye. ¹⁶Tsonsi que'ja que accuicco'choma isupa va marnga yasaja cuintsu enttinge'ye dosi israendeccu santsse ise'faye. ¹⁷Nane ña gi in'jaëña cuintsu egiptondeccu ñoa'me iyicca'yepa que'ima marnga'qqe mandian'faye. Tsonsi gi ña oshacho'choma faraón, pa'cco tise sundarondeccu toya'caen tise'pa caro, cavayoma'qqe sefaemba canjaëña. ¹⁸Tsa'caen ña oshacho'choma canjaemba faraón, tise caro toya'caen cavayoma sefaensi tsu egiptondeccuja ñamajan Na'su Chiga qqen in'jan'faya.

¹⁹Chiga tsa'caen susi tse'faei'ccuyi Chigama sefaconi'su shondo'su toya'caen unjimba'cco israendeccumma o'tie jayi'cho cambiamba tsendeccumbe sepaccofanga da'fa. ²⁰Tsa'caen dapa tsu tsa unjimba'ccoja egipto'su sundarondeccumbe otufae attiamba toya'caen israendeccumbe sepaccofae attian'jen. Egiptondeccungaja si'ame attian. Tsa'ma israendeccumgaja a'tatssia've chanjumba tise'pama chanjen. Tsa'cansi egiptondeccuja tsequi cose israendeccumga catseye osha'fambi.

²¹Moisés tise tivema marnga yasasi Na'su Chigaja chiga sombo'jeni'su fingiama moe. Tsa'caen moesi quian'me jipa pa'cco cose fingiamba enttinge'ye marma doña. Tsa'caen doñamba tsu Na'su Chiga enttinge marma san'ame tson ²²cuintsu israendeccu tsangae santsse ise'faye. Nane tansinfani toya'caen pavefani tsu mar tsa'ccuja ttuquia'caen jincho. Tsambe enttinge'ye tsu ise'fa.

²³Tsa'caen ise'fa'ni'qqe poiyyi'cco faraón carondeccu toya'caen tise cavayonga jacan'cho sundarondeccu israendeccumma sepaccoc mandiamba enttinge marnga ja'fa. ²⁴Tsa'ma a'taningae Na'su Chigaja unjimba'cco toya'caen si'ng'e'ye egipto sundarondeccumma attepa tise'pama qqeña. ²⁵Toya'caen tise'pa caro tsu'ttema'qqe shichhasi quian'me ja'masia've da. Tsonsi egiptondeccuja su'fa:

—¡Jinge ccuyaye israendeccu'ye! ¡Na'su Chiga tsu tsendeccone sepie ingi'ccu iyicco'je!

²⁶Tsa'ma Na'su Chigaja Moisésnga su:

—Que tivema marnga yasaja cuintsu ccase na'eme dapa amppipa egiptondeccu, tise'pa caro toya'caen cavayoma'qqe piccoye.

²⁷Moisés tise tivema marnga yasasi a'taningae tsa'ccuja ccase pa'cco na'eme da. Egiptondeccu ccuyaye tson'jensi marja tise'pama picco. Tsa'caen tsu Na'su Chigaja tise'pama andeccon. ²⁸Nane tsa'ccu ccase na'eme dapa pa'cco caro, pa'cco cavayo toya'caen pa'cco sundarondeccu israendeccumma mandiamba

ca'ni'chondeccuma picco cati. Ni fae'ccoyi'qqe faraón sundaroja ccushambi. ²⁹Tsa'ma israendecuja marma santsse ise'fa. Nane tansinfani toya'caen pavefani tsu mar tsa'ccuja ttuquia'caen jincho. Tsambe enttinge'ye tsu ise'fa.

³⁰Tsequi a'ta tsu Na'su Chigaja egiptondeccu'ye israendecuma ccushaen. Tsa'caen ccushaensi tsu israendecuja egiptondeccumbe aya, mar otafani ccui'fa'choma, atte'fa. ³¹Israendecuja tsa'caen Chiga osha'choma oshachopa egiptondeccuma tsa'caen tson'choma atepa Na'su Chigama ñotsse afa'fa. Toya'caen Na'su Chiga tise suquia'caen tsonsi tise've ñotsse in'jan'fa. Tisema shondo'su Moisésma'qqe tsa'caeni in'jamba paña'fa.

Tsa'ccu inza'a

15 ²²Tsomba Moisés israendecuma avusepa Cu'a marne sombopa a'i menia'su Shur andeni ja. Nane tres a'ta pa'cco ja'ma tsa'ccuve attembitsse jacan'fa. ²³Tsa'caen jacamba Marani nepipa tsa'ccuma atte'ma cu'iyé osha'fambi panshaen inza'osi. Tsa'cansi tsu tse'ttima Marave inisian'fa.

²⁴Tse'ttinga tsu aindecuja Moisésma afasepa qqen inajampaña'fa: “¿Jongoesuma gi cu'ifaya?” ²⁵Tsonsi Moisésja Na'su Chigama inajan cuintsu tisema futeye. Inajansi Na'suja quinisiccoma canjaen. Tsa'caen canjaensi Moisés tsa quinisiccoma saipa tsa'ccunga ttovasi ñoa'me ñotssia tsa'ccuve da.

Nane tseni tsu Na'su Chigaja israendeccu tson'choma atesuye in'jamba tsa'caen tson. Toya'caen tsu Na'su Chigaja israendecunga qqen supa manda'choma afa tise'pa ma'caen canse'faya'chove: ²⁶“Na, que Na'su Chiga su'choma ñotsse in'jan'faja. Na in'janquia'caen tson'faja. Na manda'choma pañamba tsomba pa'ccoma ña mandaquia'caen nani'faja. Tsa'caen tson'fa'ninda gi ni fae paqqe'suveyi'qqe egiptondeccuma'caen tsoñambi. Nane ña gi Na'su Chiga que'ima ccushaen'su.”

²⁷Marane sombopa Elimni nepi'fa. Tseni tsu dose tsa'ccu sombo'je'tti jin. Toya'caen setenta quini'jin tseni ccutsu'fa. Tseni nepipa tsa'ccu jin'ttini can'jen'fa.

Chiga manáma afe'cho

16 ¹Can'jemba pa'cco israendeccu Elimne sombopa Sin a'i menia nepi'fa. Tsata tsu Elim Sinaí enttingeni jin. Tsequi tsu segundo ccovu quince a'tave nepi tise'pa Egiptone sombopa ja'cho a'tane. ²Tseni a'i menia aindecuja Moisés toya'caen Aarónma afaseye ashaen'fa ³qqen supa:

—Ma'caen'qqe Na'su Chiga ingima Egiptone somboembecan'da gi tseni pa'faye'can. Tseninda gi aña'cho api'ccu pporotsse dyaipa tteppu'tse an'jen'fa. Tsa'ma que'ija va a'i menianga i'fa ingi poi'yi'ccoma qquipoe'sian fi'ttiye.

⁴Tsonsi Na'su Chigaja Moisésnga su:

—Unjin tuiquia'caen gi sefacconi'su aña'cho nama amppiañe tson'jen cuintsu an'faye. Aindecuta tsu poi a'ta japa tsequi a'tane'ñi

tail'je'faya'cho. Atesuye gi in'jan majan ñama paña'faya'chove toya'caen majan me'inchoa've. ⁵Tsa'ma sexto a'ta tsu tisu pa'cco a'ta tai'je'choma ti'tsse'tsse dos a'tane taiya'cho.

⁶Tsama pañamba Moisés toya'caen Aarón israendecunga conda'fa:

—Sime tsonsi qui in'jan'faya Na'su Chiga que'ima Egiptone somboen'chove. ⁷Toya'caen tu'i sinte qui atte'faya Na'su Chigambe ñotssiam. Nane tayo tsu paña que'i tisema afase'choma. ¿Ñoa'me ingima afase qqen in'jamba ti qui ingima afase'fa?

⁸Toya'caen tsu Moisésja su:

—Sime tsu Na'su Chigaja aña'choma afeya que'i an'faye. Toya'caen tu'i sinte tsu panma tsain'bitsse afeya. Nane tayo tsu paña que'i tisema afase'choma. Ñoa'me ingitsse tson'su'fambi gi. Que'ita qui ingima afase'fambi. Tsa'ma Na'su Chigama qui afase'fa.

⁹Omboe Moisésja Aarónma su:

—Poiyi'cco israendecunga condaja cuiitsu Na'su Chiga attian'chonga catse'faye. Nane tiseja paña'jen tisema afase'choma.

¹⁰Tsa'caen susi Aarón israendecunga afa'je'ni tse'faei'ccuyi poiyi'cco tsendeccu a'i menia'ma cambia atte'fa Na'su Chiga unjimba'cco'ye chanjumba attian'choma. ¹¹Tsonsi Na'su Chigaja Moisésnga su:

¹²—Paña gi israendecunga afase'choma. Tsendecunga afapa qqen suja: 'Sime qui aña'choma an'faya. Toya'caen tu'i sinte'ta panma qui tte'pptsse an'faya. Tse'i qui in'jan'faya ñoa'me ñajan Na'su que'i Chigave.'

¹³Tsequi sime tsu tsain'bitssi yayapa chivi'ri jipa canquenga on'ba'e ande'fa. Toya'caen ccaqui sinte'ja suruno shoshovinga boquia'caen tise'pa can'jen'cho utufani sheque. ¹⁴Tsa'caen bo'cho samba'ta tsu ta'e'chocoe ishopa pa'cco a'i menianga sheque. ¹⁵Tsa'ma israendecuja jongoesuve atesumbipa tsesuma atepa tisupanaccu asi'ttaen'fa: “¿Vaja jongoesu te?” Tsonsi Moisésja su:

—Vata tsu pan, Na'su Chiga que'i aña'afe'cho. ¹⁶Tsa'ma qqen tsu Na'su Chigaja tsane manda: Poiyi'cco que'i tisupa aña'ccoeyi tai'faja. Nane mañi'cco tisupa tsaoni can'jen'chone in'jamba fae a'ine dos litroa'caen tsu tai'faya'cho.

¹⁷⁻¹⁸Tsa'caen susi israendecuja tsa'caen tson'fa. Na'su agattopa mandaquia'caen tsu majan ti'tsse majan bove'ccoe tai'fa. Majan ti'tsse tai'ni'qqe antteyembi. Ni re'riccoe tai'su'qqe shacambitsse an'fa. Nane poiyi'cco tsu tisupa aña'ccoeyi tai'fa. ¹⁹Omboe Moisésja su:

—Majañi'qqe tsu ccaqui a'tane antte'masia.

²⁰Tsa'caen Moisés su'choma paña'ma majandecuja ccaqui a'tane'qqe anque'suma antte'fa. Tsa'ma tise'pa anttepa ñoña'choja misiangepa tssu'jutsse tssu'jian. Tsa'caen tson'fasi Moisésja tsendeccuma iyicca'ye.

²¹Poiyi'cco tsu tisupa aña'chove sinte'yi tai'je'fa. Nane coe'je de'ninda pa'cco tsu tssutssu'je. ²²Tsa'ma sexto a'ta tsu dos a'tane tai'fa. Tsata tsu fae a'ine ccattufayi litroquia'can. Tsa'caen tai'fasi israe'su coenzandecuja Moisésnga conda'su ja'fasi ²³Moisésja su:

—Tsa'can tsu Na'su Chiga manda'choja. Tu'i tsu ño'faya'cho a'ta. Nane ño'fapa Na'su Chigama ñajaña'cho a'ta tsu. Tsa'cansi ja'ñoñi sho'ccoña'chove an'bian'da sho'ccoñ'faja. Toya'caen goa'ttiaña'chove an'bian'da goa'ttian'faja. Ja'ño an antteye'choma coira'faja tu'ine.

²⁴Tsendeccuja Moisés manda'choma pañamba tsequi a'ta an antteye'choma ccaquine ñoña'fa. Ccaqui a'tasi tise'pa ñoña'choja tssu'jiambi ni misiangembi. ²⁵Tsonsi Moisésja su:

—Ja'ño an'faja. Ja'ño tsu ño'fapa Na'su Chigama ñajaña'cho a'ta. Nane ja'ño a'taja que'i tai'je'ni sombo'masia tsu. ²⁶Seis a'tayi tsu tai'je'faya'cho. Tsa'ma septimo a'taja ño'faya'cho a'tasi sema'ma'quia a'ta tsu.

²⁷Tsa'ma majandeccuja septimo a'ta'qqe taiye japa jongoesuveyi'qqe atte'fambi. ²⁸Tsonsi Na'su Chigaja Moisésnga su:

—¿Mi'nge'e'qqe qui ña atesian'choma pañambiquia'caen ña manda'choma tson'fambi? ²⁹Ñotsse in'jan'faja ña Na'su gi ño'faya'cho a'tave que'inga ante. Tsa'camba gi sexto a'tayi dos a'ta añ'a'chove afe. Tsa'cansi tsu septimo a'taja majañi'qqe tisu tsa'o'ye sombombe'yi can'faya'cho.

³⁰Tsa'caen susi aindeccuja septimo a'tama ño'faya'cho a'tave ñoña'fa.

³¹Israendeccuja tise'pa taipa an'jen'choma manáme qqen inisian'fa. Tsata tsu tototssi, chipiri culantro choa'can'cho'cco. Nane cuñajun'choa'caen ansintssi tsu.

³²Omboe Moisésja su:

—Tsa'can tsu Na'su Chiga manda'choja: 'Dos litro manáma taipa apinga on'boemba ñotsse coira'faja cuintsu que'i omba'su dushundeccu'qqe atte'faye. Attepa tsu in'jan'faja ña que'ima Egiptone somboemba a'i menia angapa ofian'jen'choma.'

³³Tsomba Moisésja Aarónja su:

—Dos litro manáma taipa apinga on'boenjan. Tsomba Na'su Chiga attian'jen'ttinga ccutsiamba coiraja cuintsu que'i omba'su dushundeccu atte'faye.

³⁴Na'su Chiga Moisésnga manda'quia'caen Aarónjan apinga on'boemba Chiga a'liccu fae'ngae injancco'fa'chove canjaen'cho cafon jin'ttinga ccutsiamba coira'je.

³⁵Israendeccuja cuarenta canque'fa pa'cco tsesu manáma amba canse'fa. Nane a'i can'jeni nepiya'ngae tsu tsa'caen an'jen'fa. Canaán andeni nepipa ca'niña'ngae tsu manáma an'jen'fa.

³⁶(Dos litro tsu, tise'pa aya'fangae, fae *gomer*. Diez *gomer* tsu fae *efa*.)

Patuvo'cho'ye tsa'ccu sombo'cho

17 ¹Poiyi'cco israendeccu Sin a'i menia'ñe sombopa vasia've ja'ñacca'fa Na'su Chiga tise'pama manda'quia'caen. Tsa'caen ja'ñaccapa Refidimni nepipa tse'tti can'jen'fa. Tsa'ma tse'ttija tsa'ccuve me'i'on tsu aindeccu cui'jeya'chove. ²Tsa'cansi tsu aindeccuja Moisési'ccu qqen afacco'fa: —¡Tsa'ccuma afeja ingi cui'ye!

Tsonsi Moisésja su:

—¿Jongoesie qui ñai'ccu afacco'fa? ¿Jongoesie qui Chigama noñangiancán'fa?

³Tsa'ma aindecuaja tsaquie'supa Moisésma afase'fa qquen supa:

—¿Jongoesie qui ingima Egiptone somboen? ¿Aquia ingima tsaquie'sian fi'ttiye ti qui somboen, toya'caen ingi dushundeccu, ingi aiña'choi'ccu fae'ngae?

⁴Pañamba Moisésja Na'su Chigama iñajan:

—¿Ma'caen gi va aindecungna tsoña? Maqui'ta tsu ñama patui'ccu fi'tti'faya.

⁵Tsonsi Na'suja su:

—Majan coenzandecuma angapa canqquesundeccu caña'jen'fa'ni panshanjan. Toya'caen na'ema ochhai'je'cho quini'ccoma'qqe angapa panshanjan. ⁶Ñanda gi Horeb ccotta'cco'su patuvo'choni queve ronda'jeya. Tsanga nepipa patuvo'choma ochhaisi tsu tsa'ccuja somboya cuintsu aindecu cu'i'faye.

Moisés poi'cco israe'su coenzandeccu caña'jen'ni ⁷tsa'caen tsomba tse'ttima Meriba qquen inisian. Nane israendeccu afacco'fattisi tsa'caen inisian. Toya'caen Masah qquen inisian, israendeccu Chigama noñangiamba'ttisi. Nane noñangiancamba tsu qquen su'fa: “¿Can'jen miconde Na'su Chigaja ingi'ccu? ¿Tsambi'ta me'in?”

Amalecitandecui'ccu geraen'fa'cho

⁸Tsa'caen israendeccu Refidimni can'jen'ni amalecitandecuaja israendecui'ccu gerae'ne ji'fa. ⁹Tsonsi Moisésja Josuéma su:

—Majan tsandiendecuma avusepa amalecitandecui'ccu iyicco'faja. Ñanda gi tu'i Chiga quini'ccoma indipa ccotta'cco'cho ombani ccutsuya.

¹⁰Josuéja Moisés mandaquia'caen tsomba amalecitandecui'ccu iyiccoye ja. Tsa'caen jasi Moisés, Aarón toya'caen Hur tsu ccotta'cco'chonga ansunde'fa. ¹¹Iyicco'je'fasi Moisés tise tivema yasa'ninda tsu israendeccu ganajin'fa. Tsa'ma Moisés antte'nijan amalecitandecu ganajin'fa. ¹²Tsa'caen tson'jemba Moisés tive quimbisi patuma isupa ccuiña'fa cuintsu tsanga dyaiye. Dyaisi Aarón toya'caen Hur poifa'su tivema indicho'fa cuintsu yasachoye. Tsa'caen indicho'fasi Moisésja chiga amppiya'ngae anttembitsseyi yasajin dyai. ¹³Tsa'caen tsonsi Josuéja tisu aindecui'ccu amalecitandecuma ganamba matichi'ccu fitti'tti.

¹⁴Tsonsi Na'su Chigaja Moisésnga su:

—Va tson'choma tevaenjan tisu injan'je'ne. Toya'caen Josuénga suja amalecitandecuma fi'ttipa gi tise'pane injan'jen'choma'qqe metsse ccuchaya.

¹⁵Tsomba Moisésja Chiganga afeye oque'je'chove ñoñamba tsama qquen inisian “Na'su Chiga tsu ña bandera.” ¹⁶Toya'caen tsu su:

“iNa'su Chiga banderama indipa

angacán'faya'cho!
 ¡Na'su Chiga tsu Amalecitandeccui'ccu
 tsangae geraen'jeña!”

Israendecchu Sinaíni nepi'cho

19 ¹Israendecchuja tise'pa Egiptone sombo'cho tres ccovuve nepisi Sinaí a'i menia nepi'fa. ²Refidimne sombopa Sinaí a'i menia nepipa tse'tti can'jen'fa ccotta'cco isevetsse. ³Chiga ttu'sesi Moisésja ccotta'ccongansunde Chigama cachuiye. Ansundesi Na'suja ccotta'cco'ye tisema su:

—Va ña quenga su'choma tansintsse condaja Jacob omba'su dushundecunga tsa israendecunga: ⁴'Poiyi'cco qui atte'fa ña egiptondeccunga tson'choma; toya'caen ma'caen ña que'ima va tisu can'jeni i'choma. Nane pindonga ancamba jiquia'caen qui vani nepi'fa. ⁵Tsa'camba que'i ñama ñotsse pañamba ñai'ccu injancco'ta qui ñoa'me ña aindecchu'faya. Nane poi ande'su aindecchu tsu ñambe'fa. Tsa'ma que'ija poiyi'cco aindecchuma ti'tsse ñambe'faya qui. ⁶Que'i qui ñoa'me ñama afa'su aindecchuve da'faya. Ñoa'me ñama shondo'su aindecchu'faya qui. Pa'cco va ña su'choma israendecunga condaja.

⁷Tsa'caen susi pañamba jipa Moisésja israe'su coenzandecchuma ttu'sepa pa'cco Na'su tisenga mandapa su'choma condase. ⁸Tsama pañamba israendecchuja poiyi'cco fae'ngatsse in'jamba su'fa:

—Pa'cco Na'su Chiga su'choma jinge tsoñe.

Tsa'caen su'fasi Moisésja Na'sunga japa tsama condasi ⁹pañamba Na'suja su:

—Que canjan, sintssia unjimba'cco'ye gi quenga attiaña cuintsu aindecchuja ña quenga afa'choma pañamba tsangae quema ñotsse in'jamba paña'jen'faye.

Moisésja ccase aindecchu su'choma Na'sunga condasi ¹⁰Na'su Chigaja su:

—Japa aindecchuma ja'ño tu'i'qqe ñoñajan cuintsu ñame injan'jen'faye.

Nane sarupama'qqe tsu ma'ppamba ¹¹tisuma'qqe ñoñaña'cho tui'vene. Nane ña Na'su Chigata gi tui've Sinaí ccotta'ccongandeya poiyi'cco aindecchu caña'jen'ni. ¹²Ccotta'cco andepa'fanga ma'caen ccutsu'faya'chove condaja cuintsu aindecchu panshambeyi can'faye. Nane tsa ccotta'ccoja ansunde'masia tsu, toya'caen catse'ma'sia. Majan catse'ninda tsu fi'ttiya'cho. ¹³Tsa'ma majaan'i'qqe tisema pporaembe'yi patui'ccu tsambi'ta oma'ccoi'ccu tsu fi'ttiya'cho. Nane a'i tsambi'ta aiña'cho tsa'caen tson'ninda tsu junde fi'ttiya'cho. Tsonjen'choma pañambayi tsu aindecchuja tsa ccotta'ccongacatseye osha'fa.

¹⁴Chiga tsa'caen susi pañamba Moisésja ande aindecchuma ñoñañe cuintsu Chigama iñajan'jen'faye. Aindecchu tise'pa sarupama ma'ppan'fasi ¹⁵Moisésja su:

—Ñoña'jen'faja tui'vene. Toya'caen pushesui'ccu can'jen'fajama.

¹⁶Dos al'ta pasasi tsanda tsu veyamba afa'je. Toya'caen sintssia unjimba'cco tsu tsa ccotta'ccoma picco. Nane tsonjen'cho quian'me jen'choma pañamba

poiyl'cco canjensundeccu ttun'dundul'je'le dyo'fa. ¹⁷Tsa'caen tsonsi Moisésja aindecuma canqque'ye somboemba anga Chigai'ccu cachuiccoye. Angapa tise'pama ccotta'cco utufanga ccutsian itoyian. ¹⁸Tsonsi si'nge enttinge'ye Chiga Sinaí ccotta'cconganga andesi tsu tsa ccotta'cco'ye onfen'ba sombo. Nane onfen'bata tsu panme matssan'jen'cho'ye somboquua'caen oro'je. Toya'caen pa'cco ccotta'cco tsu dyo'oe oya'je. ¹⁹Toya'caen tsonjen'cho jen'jen'cho'qqe ti'tsse quian'me je'ñacca'ni Moisés afasi Chigaja tsanda afaquua'caen afa.

²⁰Tsomba Na'su Chigaja Sinaí ccotta'cco tansin'choni andepa Moisésma su cuintsu jundeyi tisenga ansundeye. Moisés ansundes ²¹Na'su Chigaja su:

—Andepa aindecunga condaja cuintsu majañi'qqe panshamba ñama atteqquen tsonbe'yi ccutsu'faye. In'jambi gi tsain'bitssi tsendeccu'su pa'faye. ²²Nane Chigama afa'su nasundeccu ñanga catseye osha'cho'a'qqe tsu tisupama ñotsse ñoñaña'cho ña tise'pama iyicca'yesa'ne. Tsa'caen iyicca'yeta gi tise'pama dañña.

²³Tsonsi Moisésja Na'sunga su:

—Aindecuja in'jan'faya'bi va Sinaí ccotta'cconganga ansundeye. Nane queyi qui se'pi majañi'qqe panshambitsse tseni ccutsu'faye vaja que andesi.

²⁴Tsa'ma Na'su Chigaja su:

—Andepa japa jai'ngae Aaróni'ccu ansundeja. Tsa'ma Chigama afasundeccu toya'caen aindecuma'qqe se'pija cuintsu ña can'jeni ansundembe'yi can'faye. Ña iyicca'yepa tise'pama dañosa'ne.

²⁵Tsonsi Moisésja andepa poiyl'cconganga ccase condase.

Diez manda'chove afa'cho

20 ¹Chigaja afapa pa'cco vama conda:

²“Ña gi Na'su, que Chiga, que Egiptoni tsangae sema'suve da'cho'ye somboen'su.

³“Faesu chigave ñama'caen an'bianjama.

⁴“Ñoña'cho chiga'can'me ñoñajama. Ni sefani jinque'suve, ni andeni jinque'suve, ni ande tsosini'su marni jinque'suve chiga qqen ñoñajama.

⁵Tsesundeccunga puntssamba inñanjama. Nane ñañi gi Na'su, que Chiga. Sepipa Chiga gi ñama chigapa egae tsincon'su injama'choma somboemba tise dushundeccu, tsambe du'shumbe dushundeccu injama'choma'qqe somboeña tise'pa egae tsincon'chone. ⁶Tsa'ma ñama in'jamba pañasundeccunga gi mil omba'su dutssiyendeccunga ñotsse tsoña.

⁷“Aquia injanga Na'su, que Chiga inisema egae afajama. Nane Chigaja tise inisema egae afa'suma vanaembe pasaya'bi tsu.

⁸“Injan'jen'faja ño'faya'cho a'tama tsa Na'su Chigama inñaña'quima. ⁹Seis a'tayi tsu semaña'cho tisu jongoesuma semaña'chove an'bian'da. ¹⁰Tsa'ma septimo a'ta tsu ño'faya'cho, tsa que Na'suma inñaña'qui. Tsequi a'ta jongoesuveyi'qqe sema'fajama. Ni que dutssi'ye ni que onque'nge, ni quembe sema'su tsandie, sema'su pushesu, ni que aiña'cho, ni ccani'su a'i que andeni can'jen'cho'qqe

sema'masia tsu. ¹¹Nane Na'su Chigaja seis a'tayi tsu sefacco, ande, mar, osha'cho tsani can'jenqqe'suve agattoemba septimo a'taja ño'fa. Tsa'camba tsa Na'su Chigaja tsequi a'tama ño'faya'chove anttepa tise ma iñajaña'cho a'tave tson.

¹²“Ñotsse tsu in'jaña'cho que yaya, que mamama cuintu Chiga, que Na'su, tsain'bitsse va quenga afeya'cho andeni canseya'chove antteye.

¹³“A'ima fi'ttijama.

¹⁴“Tisu pushema ni tisu tsa'nduma catijama faesui'ccu canseye.

¹⁵“Cca'najama.

¹⁶“Afoopenjama tisu paporama dañomba afa'sane.

¹⁷“Tisu injamáchoni faesu an'bian'chove tisu mbema'caen in'janjama; ni tise tsa'o, ni tise pushe, ni tise'be sema'su tsandie, sema'su pushesu, ni tise'be sema'su vaura, ni tise boro, ni jongoesuveyi'qqe tisu mbe qqen in'janjama.”

Israendecu Chigama dyo'cho

¹⁸Poiyi'cco israendecu tsu tsa tsanda veyamba afa'choma, tsonjen'cho jen'choma, toya'caen ccotta'cco'ye onfen'ba sombo'choma attesundecu. Tsa'ma tsama atepa ñoa'me dyopa tse'ttie joqqitssi'cca'fa. ¹⁹Tsomba Moisésma su'fa:

—Afa' que, ingi quema pañañe. Tsambi'pa Chigayi inginga afa'ninda gi dyo pa'faya.

²⁰Tsonsi Moisésja su:

—¡Dyombe can'faja! Chigata tsu ji ingima atesucañe. Ñoa'me dyo'ta gi tise ma dyoe'sui'ccuyi injan'jemba egae tsincombe canse'faya.

²¹Tsa'caen aindecu joqqitssi'je'ni Moisésja tsa Chiga can'jen'cho unjimba'cco sintssianga catse.

Chigama sefacconi'su shondo'su

23 Tsonsi Chigaja Moisésnga su:

²⁰“Que canjan, ña gi que'ima o'tie moeña ñama sefacconi'su shondo'suma cuintu que'ima coirapa angaye que'imbe ñoña'cho andeni.

²¹Tise'ye attufa'fajama. Tise ma ñotsse paña'faja pañambiquia'caen

tsinconsa'ne. Nane tiseja ñoa'me ña'cantsse afa'su tsu. Que'li egae

tsincon'choma aqqe'paya'bi tsu. ²²Tsa'ma ñama sefacconi'su shondo'su

su'choma ñotsse pañamba pa'cco ña manda'choma tson'ninda gi ñajan

que'li'ccu iyicosundecui'ccu iyicco'jeya; toya'caen que'ima se'pisundecuma gi

sepi'jeya. ²³Nane ñama sefacconi'su shondo'su tsu que'ima o'tie japa angaya tsa

amorreo, hitita, ferezeo, cananeo, heveo, toya'caen jebuseondeccu can'jen'cho

andeni. Tsendecuma gi me'tsse sefaña. ²⁴Tsa andesundecu tson'jen'chonga

ma'de'fajama. Tsendecumbe chiganga ccaru'fajama ni tsanga iñajan'fajama.

Tsa'ma tise'pa ñoña'cho chigandecuma me'tsse catipa tise'pa iñajan'jen'cho

patu ccutsu'choma'qqe ttova cati'faja. ²⁵Que Na'su Chigangayi iñajan'jen'faja.

Tsa'caen iñajansi tsu que'li pan, toya'caen que'li tsa'ccuma'qqe ñotsse tsoña.

“Toya'caen paqqe'suma'qqe gi que'i'ye joqqitssiaña. ²⁶Tsomba gi que'ima tsoña tisu paya'cho a'ta nepimbi'te pa'masia've. Toya'caen ni fae pushesuyi'qqe tsu que'i ande'suja toya chu'ama cati'je'cho ni dusumbiyi'qqe jincho'faya'bi.

²⁷“Nane ña gi tsoña cuintu poi'cco cca'isundeccuja ña que'i'ccu can'jen qqen in'jamba dyojo'faye. Toya'caen mani'su aindecunga que'i ja'fa'nijan tise'pa injama'choma gi qqeñaña cuintu que'ima atepa ccuya'faye. ²⁸Nane pa'ttanga dyopa ccuya'quia'caen tsu heveondecu, hititandeccu, toya'caen cananeondecu que'ima atepa ccuya'faya. ²⁹Fae canqqe'fangayi tsani can'jensundecuma joqqitssiaña'bi gi panshaen aquia ande catiyesa'ne; toya'caen osha'cho putsu tsampini can'jenqqe'su atapapa que'ima vanaesa'ne. ³⁰Tsa'ma ti'tsse que'i atapajisi vasia've gi joqqitssiaña'ccaya cuintu tsa andeni que'i dushundeccuja can'jen'faye. ³¹Ñanda gi antteya cuintu que'i ande qqen jinchoye: Cu'a marne ashaemba Filisteondecu marni nepiya'cho. Toya'caen a'i menia'ñe ashaemba Eufates naini nepiye. Nane quenga gi tayo afe tsa aindecu can'jen'cho andema. Tsa'cansi que'i qui tise'pama tteya maña'faya.

³²“Tise'pai'ccu injanco'fajama ni tise'pa chigandecuma in'jan'fajama; ³³ni tise'pama antte'fajama cuintu que'i'ccu fae'ngae que'i andeni can'jeñe. Nane tsa'caen fae'ngae can'jen'fajama tise'pa que'ima in'jaensi tise'pa chigandecuma in'jamba ñama egae tsinconsa'ne. Tsa'caen tson'da qui tisu'pama tsangae qqeña'faya.”

Chiga injanccoye afa'cho

24 ¹Na'su Chigaja Moisésnga su:

—Ña can'jeni ansundeja, que, Aarón, Nadab, Abiú, toya'caen setenta israe'su coenzandeccu'ccu. Tsa'ma biaccaccatsseyi jipa tse'ttingayi ccaru'faja. ²Jo'su queyi qui ñanga catseye osha. Tsa cca'indeccuta tsu ñanga catse'ma'sia. Toya'caen aindecu'ccu fae'ngae ansundeje osha'fambi.

³Tsa'caen pañamba Moisésja Na'su Chiga afapa manda'choma aindecunga condase. Pañamba poi'cco fae'ngae in'jamba qqen su'fa:

—Jinge pa'cco Na'su Chiga manda'choma pañamba tsoñe.

⁴Tsa'caen su'fasi Moisésja pa'cco Na'su Chiga su'choma tevaen. Ccaqui a'ta ñoa'me sinte'yi jangipa ccotta'cco tsosiccuni Chiganga afeye oque'je'chove ñoña. Toya'caen dose patu biaccova'ma'qqe ccutsutsian cuintu dose Israel naccuve canjeñe. ⁵Omboe Moisésja israe'su tsandiendecuma manda cuintu vaura quitsayema fi'ttipa Na'su Chiganga oque oraen'faye; toya'caen Chigama ñoquiaña'chove'qqe afe'faye. ⁶Moisésja tsa'su anjampama enttingeve tasanga boña. Toya'caen enttingeve tsa Chiganga afeye oque'je'chonga zanzan. ⁷Omboe Moisésja Chigai'ccu injanco'fa'cho tevaen'jema poi'cco paña'jen'ni afa. Afasi pañamba su'fa:

—Jinge pa'cco Na'su Chiga manda'choma ñotsse in'jamba tson'faye.

⁸Tsa'caen su'fasi Moisésja anjampama isupa aindecunga zanzapa qqen su:

—Va anjampa tsu que'i Na'su Chigai'ccu injancco'fa'choma canjaen, que'i tayo tise condase'choma pañasi.

⁹Tsomba Moisésja Aarón, Nadab, Abiú, toya'caen setenta israe'su coenzandecui'ccu ccotta'cconga ansunde. ¹⁰Tseni tsu atte'fa israendecumbe Chigama. Nane tise tsu'tte tsosiccuni tsu veyaratssia totoa patiaen chanjun. Toya'caen sefaccoa'caen a'tatssi tsu. ¹¹Tsa'caen israe'su joccapitssia nasundecu Chigama atte'ma mingae'qqe da'fambi. Nane toya tsu cansepa amba cui'je'fa.

Moisés Sinaí can'jen'cho

¹²Tsonsi Na'su Chigaja Moisésnga su:

—Ña can'jen'cho ccotta'cconga ansundepa tse'tti ñame ronda'jeja. Nane quenga gi afeye in'jan dos patufin'dinga ña manda'chove tevaen'choma cuintu israendecuma manda'jeje.

¹³Tsama pañamba Moisésja jangipa tisema shondo'su Josuéi'ccu Chiga can'jen'cho ccotta'cconga ansunde. ¹⁴Israe'su coenzandecumajan qquen su:

—Que'ija va'tti ronda'je'faja ingi ccase jiya'ngae. Vani que'i'ccu tsu can'jeña Aarón toya'caen Hur. Tsendecunga qui jongoesu vana'chove an'bian'da condaye osha'fa.

¹⁵Tsa'caen supa Moisésja ccotta'cconga ansunde. Tsa ccotta'cco tsu pa'cco unjimba'ccoyi ccutsu'cho. ¹⁶Na'su Chiga ñotssia tsu Sinaí ccotta'cconi can'jen. Nane seis a'ta tsu tsa unjimba'ccoja ccotta'ccoma picco'cho. Toya'caen septimo a'ta tsu Na'su Chigaja tsa unjimba'cco'ye Moisésma ttu'se. ¹⁷Israendecu tsosiccuni ccutsu'chondeccu Na'su Chiga ñotssiam a'tesi tsu ñoa'me ccotta'cco tansin'chone si'nge anchanda'jequua'caen attian tise'pa tso'fenga. ¹⁸Tsonsi Moisésja tsa unjimba'cconga ca'nimba ccotta'cconga ansundepa cuarenta a'ta pa'cco cuarenta cose'qqe tseni can'jen.

Cachuicco'je'ttve ñoñañe afe'cho

25 ¹Na'su Chiga Moisésnga qquen su:

²“Israendecuma suja cuintu tisupa injama'choi'ccu ñoa'me afeye in'jan'da ñame in'jamba afe'choma afe'faye. ³Nane vasuma tsu afe'faya'cho: cori, totoa cori, cu'a yoshava, ⁴pajaccopa sarupa, toya'caen sarupa singu'a, sarupa cu'a, totoa lino sarupa, chivo tose, ⁵oveja ttonoma cu'ave onjoen'cho, faesu ñotssia chhariccotssia ttono, ñotssia caova quini'cco, ⁶tuñoma setsaenque'su yayapa, Chigambe qquen canjaeña yayapaenque'suve toya'caen oque oraenque'suve ñoñañe ño'metssia ñome'ba, ⁷ñotssia si'an patu, osha'cho bareque'su patuve'qqe. (Nane tsesu patuma tsu ancaeña'cho Chigama afa'su na'sumbe conto opipa'chonga toya'caen utu'chonga anduque'suve ñoña'chonga.)

⁸Toya'caen ña tise'pai'ccu can'jemba cachuicco'je'ya'cho ttuccuve'qqe ñoñajan. ⁹Tsa'ma tsa ña can'jeña'cho ttuccu, pa'cco tseni jincho'choma'qqe tsu ñoa'me ñotsse pa'ccoma ñoñañe'cho ña quenga canjaenquiacantsse.”

Cachuicco'je'ttive ñoñasundeccu

31 ¹Na'su Chiga Moisésnga qquen su:
²“Que canjan, Judá aindeccu'su Bezaleel, tsa Uri dutssi'yema gi in'jan cuintsu ñama cachuicco'je'ttive ñoñañe. Tsambe yaya ccashe'ye tsu Hur.
³Nane Chiga Qquendya'pa tisenga ca'nimba in'jaensi tsu osha'chove atesupa, injama'choni agattoenqquia'caen cuname in'jamba ñotsse ñoñaña'chove in'jaña. ⁴Toya'caen osha'choma tisu in'janquia'caen ñotsse divoja'choi'ccu divojapa ñoñaña. Nane cori, totoacori, cu'a yoshavama semamba jongoesu divoja'choi'ccu in'jan'da tsa'caen tsu ñoñaña. ⁵Bare'cho patuma'qqe veyaratssia've giyaemba ancancaeñe'qqe tsu atesu. Toya'caen quini'ccoma semamba ñoñaña'chove'qqe tsu atesu. Nane osha'chove ñoñañe tsu atesu. ⁶Toya'caen gi Dan aindeccu'su Ahisamac dutssi'ye, Aholiabma, in'jan cuintsu Bezaleelma futeye. Nane poiyl'cco majan atesu'chondeccuma gi in'jaen cuintsu ti'tsse'tsse atesupa pa'ccoma ña mandaqquia'cantsse ñoña'faye. ⁷Nane tsendeccu tsu qquen ñoña'faya'cho: ñai'ccu cachuicco'je'tti, a'i'ccu injancco'fa'cho cafon, tsambe ombanga corima ñoña'cho piccofin'di, osha'cho vase'je'cho cachuicco'je'tti'su jincho, ⁸panma ccutsian'jen'cho mesa, tsani jincho vase'je'cho, cori tuñoma ccutsian'jen'cho, tsani jincho vase'je'cho, ñome'bama ccuiñamba Chiganga oque oraen'jen'cho, ⁹Chiganga afeye oque oraen'jen'cho osha'cho tsani jinque'su, tivema otishiye boña'jen'ccu, toya'caen tsa ccutsu'je'chove'qqe. Nane pa'cco tsave tsu ñoña'faya'cho. ¹⁰Toya'caen tsu Chigama afa'su Aarón, tise dutssiyendeccuma'qqe, Chigama afasundeccuve tsomba, cachuicco'je'ttinga cani'jeña'chove ondiccu'je'cho sarupave ñoña'faya'cho. ¹¹Chigambe qquen canjaeñe yayapaenque'suve toya'caen cachuicco'jeccunga oque oraenque'su ño'metssia ñome'bave ñoña'faya'cho. Nane tsendeccuta tsu pa'ccoma ña mandaqquia'cantsse nani'faya'cho”

Manda'cho patufin'dima afe'cho

¹⁸Na'su Chigaja Sinaí cotta'cco'ye Moisésnga afa nanimba dos patufin'dima afe tise manda'chove tise tsmian'ccoi'ccu tevaen'choma.

Corima ñoña'cho vaura du'shu

32 ¹Israendeccuja Moisés uta cotta'ccone jimbisi Aarónnga bopa tisema su'fa:
 —Japa chigandeccuve ñoñajan cuintsu ingima angacañe. ¿Ma'caen gi atesu'faya ingima Egiptone somboen'su Moisés ma'caen da'chove?
²Tsonsi Aarónjan su:
 —Que'i pushendeccu, que'i dutssiyendeccu, que'i onquengendeccu tsosinani dusian'cho cori sasiyoma isupa ñani i'faja.
³Tsa'caen susi poiyl'cco tise'pa tsosina'su cori sasiyoma battiamba Aaróni anga'fa. ⁴Tsonsi Aarónjan isupa tsa corima tssutssiamba fiña

cuintsu vaura du'shua'caen somboye. Tsomba ñoñaqqe'su yoshavai'ccu ñoa'me nanitsse nani. Tsonsi poiye'cco a'i tsama attepa qqen su'fa:

—¡Israendeccu, va tsu que'i chiga, que'ima Egiptone somboen'su!

⁵Tsa'caen tson'fasi attepa Aarónjan oque oraenqqe'suve tsa vaura du'shui'ccu pporotsse ñoñamba qqen fundo:

—¡Jinge tu'i fiestaen'faye Na'suma ñotsse afaye!

⁶Ccaqui a'ta sinte'yi jangipa afe'choma oque oraemba, ñoquiañe afeqqe'suve'qqe, tsa ñoña'cho vauranga afe'fa. Tsa'caen tsomba tse'i aindecuaja dyaipa amba cui'je'fa. Omboe jangipa egae tsincoñe ashaen'fa.

⁷Tsonsi Na'su Chigaja Moisésnga su:

—¡Junde andepa jaja! Egiptone que somboen'cho aindecu tsu qqeue tson'jen'fa. ⁸Nane jundeyi tsu joqquitssi'fa ña mandapa afe'cho tsaiqui'ye. Joqquitssipa tsu corima vaura du'shua'caen ñoñamba tsanga inajamba afe'choma'qqe afe'fa. Tsomba tsu qqen su'fa: '¡Israendeccu, va tsu que'i chiga, que'ima Egiptone somboen'su!'

⁹Toya'caen tsu Na'su Chigaja Moisésma su:

—Tsendecuma attepa gi in'jan tise'pa pañambiqquia'caen tsincon'fa'choma. ¹⁰Ja'ño ñama antteja ña iyicca'ye'choi'ccu metsse tsendecuma sefaeñe. Tsa'ma que'i'ccu gi tsain'bitssi a'ive atapoena.

¹¹Moisésja tsa'caen in'jambipa Na'su Chigama ñoquiañe in'jamba qqen su:

—Ña Na'su, ¿jongoesie qui que aindecuma iyicca'ye? Nane queyi qui tise'pama Egiptone somboen osha'cho paqqe'sui'ccu tsomba. ¹²Tsa'caen tson'da, ¿ma'caen qui antteya cuintsu Egiptondeccu qqen su'faye: 'Chigaja tsa'caen a'i menia angapa israendecuma fi'ttiye qqen in'jamba somboen. Nane metsse sefaeñe somboen?' Tsa'caen in'jan'fasa'ne que iyicca'ye'choma antteja. Aqqe'paja que aindecuma dañoñe in'jan'choma. ¹³Injan'jenjan quema shondo'su Abraham, Isaac, toya'caen Israelma'qqe que tsu injama'choi'ccu in'jamba ñoa'me su'chove afapa qqen su'choma: 'Que omba'su dutssiyendecuma gi atapoena cuintsu sefacconi'su o'fema agattoye oshambi'qquia'caen tise'pama'qqe agattoye oshambiye.' Toya'caen 'Pa'cco va ña afeya qqen su'cho andema gi tsangae que'inga afeya.'

¹⁴Moisés tsa'caen susi Na'su Chigaja tise aindecuma dañoñe in'jan'choma antte. ¹⁵Tsonsi Moisésja Chiga mandapa tevaemba afe'cho dos patufin'dima isupa ccotta'cco'ye andeye ashaen. Nane patufin'dita tsu poifama tevaen'cho. ¹⁶Chigayi tsu tsa patufin'dive ñoñamba tise'yi tise in'jan'choma tsanga tevaen.

¹⁷(Moisés ccotta'cco'ye andejipa Josué can'jeni jisi) Josuéja aindecu fundo'je'choma pañamba Moisésnga conda:

—Canquene geraen'jemba fundojeqquia'caen gi paña.

¹⁸Tsa'ma Moisésja su:

—Yata tsu patsupa avujapa settapoen'jen'chombi ni ganañemba ñombi'yepa settapoen'jen'chombi. Nane ñanda gi paña ccaninga settapoen'bave.

¹⁹Tsa'caen supa canquenga nepipa corima ñoña'cho vaura du'shuma atte. Toya'caen boiral'je'choma'qqe atepa ñoa'me iyicca'yepa tse'tti ccotta'cco andepa'ttinga tisu isu'cho patufin'dima ttova do'jo. ²⁰Tsa'caen tsomba jundeyi tsa vaura du'shuma isupa si'ngenga ttova ccuiña. Ttova ccuiñasi ñoa'me ju'rusi isupa vu'vutsse sun'dapa tsa'ccunga ganga. Gangapa manda cuintsu israendecu tsa'su tsa'ccuma cu'l'faye. ²¹Tsomba Aarónma su:

—¿Jongoesuma va aindeccu quenga tson'fasi qui qqen tson cuintsu va aindeccu tsa'caen egae tsincon'faye?

²²Tsonsi Aarónjan su:

—Ña na'su, ñama iyicca'yejama. Que'qqe qui ñoa'me atesu va aindeccu egae tsincon'e in'jan'choma. ²³Tise'pa tsu ñama su'fa: 'Chigandecuve ñoñajan cuintsu ingima angacañe. ¿Ma'caen gi atesu'faya ingima Egiptone somboen'su Moisés ma'caen da'chove?' ²⁴Tsonsi gi ñajan su: 'Majan corima an'bian'da afe'faja.' Tise'pa corima afesi gi si'ngenga catisi tsu va vaura du'shuv sombo.

²⁵Tsa'caen susi Moisésja in'jan aindeccu oshambipa injanga tson'fa'choma. Nane Aarón ñotsse angacambisi qqe'fasi tise'pai'ccu iyiccosundecu'qqe israendecuma chi'gapa feñañe osha'fa. ²⁶Tsa'caen in'jamba Moisésja canquenga cani'jen'ttinga ccutsupa qqen su:

—Majan Na'su Chigave injan'jen'chota ñai'ccu bo'faja.

Tsa'caen susi poiyl'cco Leví aindeccu tisenga bo'fa.

²⁷Tsonsi Moisésja tise'panga su:

—Qquen tsu Na'su Chigaja su, tsa israendecu Chiga: 'Poiyl'cco que'i'su matichima isupa poi carpani japa majan tsa vauranga iñajansundecuma fittitti'faja. Nane majan que antian, majan que amigo, toya'caen que'l'ccu pporotsse canjen'su tsa'caen tson'nijan tsendecuma'qqe fittitti'faja.'

²⁸Levítandecu tsa'caen Moisés manda'choma pañamba tson'fasi tsu tsequi a'ta tres mil a'i pa'fa. ²⁹Tsonsi Moisésja su:

—Ja'ño Na'suma pañamba que'i majan tisu dutssi'ye, majan tisu antianma fitti'ttipa qui Na'su ñotssianga ca'ni'fa. Tsa'cansi tsu ja'ño Na'su Chigaja que'ima ñotsse tsoña.

³⁰Ccaqui a'ta Moisésja aindecunga su:

—Que'ita qui ñoa'me egae tsincon'chove tson'fa. Tsa'cansi gi ja'ño ccase Na'su can'jeni ansundeya'cho. Tseni japa gi atesuya tise que'ima ñoqui'chove.

³¹Tsa'caen supa Moisésja ccase Na'su can'jeni japa qqen su:

—Nane aindecuja ñoa'me tsu egae tson'fa corima chigave ñoñamba. ³²Quema gi iñajan, chigáne tise'pama ñoqui'ja. Tsa'ma ñoquiye chi'gata ña inisema ccuchaja que tevaen'jenga tevaen'choma ña'qqe tsendecui'ccu fae'ngae catiyeve.

³³Tsa'ma Na'su Chigaja qqen su:

—Jo'su ñama chi'gapa egae tsincon'sundecumbe iniseveyi gi ccuchaya. ³⁴Tsa'cansi japa aindecuma angaja ña su'cho andeni. Ñama shondo'su tsu que'ima angaya. Tsa'ma maqui tise'pama vanaeña'cho a'ta nepisi gi tise'pa egae tsincon'chone vanaeña.

³⁵Tsa'caen supa Na'su Chigaja tsa Aarón ñoña'cho vaurama ñajansundecunga paqqe'suma moe.

Na'su Chiga ja'faye manda'cho

33 ¹Na'su Chigaja Moisésnga su:
—Va'ttie sombopa que Egiptone somboen'cho aindecuicu jaja. Nane ña Abraham, Isaac toya'caen Jacobnga supa tise'pa omba'su dushundecunga afeye su'cho andeni jaja. ²Ña gi moeña ñama shondo'suma cuintsu que'ima angaye. Toya'caen gi tsoña cuintsu tsa ande'su cananeondeccu, amorreondeccu, hititandeccu, ferezeondeccu, heveondeccu, toya'caen jebuseondeccuma joqqitssiañe. ³Ja'faja. Nane tseni tsu chocho, tuño cuñajun'cho'qqe tsa'qquia'caen sombo'je'cho ande. Tsa'ma ñajan que'i'ccu fae'ngae jaya'bi gi in'jamba'qqe que'ima utu tsaiquina sefaensa'ne. Nane que'ita qui ñoa'me injiengembitssi'fa.

⁴Aindecuja tsa'caen afasepa su'choma pañamba ñoa'me ñombi'yepa majañi'qqe ccase sasiyoma dusian'fambi ni andu'pama andu'fambi.

⁵Nane Na'su Chiga tsu Moisésnga qqen su:

—Israendecunga vama condaja: 'Que'i qui ñoa'me injiengembitssi'fa. Nane ña que'i'ccu aquia re'ricco can'jen'choecan'da gi metsse que'ima sefañe'can. Ja'ñoñi sasiyo, andupama'qqe antte'faja. Tsónsi gi atteya ma'caen que'ima tsoña'chove.'

⁶Tsa'caen susi pañamba israendecuja Horeb ccotta'cco'ye sombo'ta poiyo'cco tise'pa sasiyo, andupama'qqe andu'fambi.

Chigai'ccu cachuicco'je'tti'su carpa

⁷Moisésja atesu faesu carpama canque joccani ccutsiañe. Ccutsiamba tsa carpama inisian: Chigai'ccu cachuicco'je'cho carpa. Majan a'i Na'su Chigama ñajañe in'jan'da tsa canque joccani ccutsu'cho carpani ja'je'fa. ⁸Nane maqui Moisés tsa carpani jayi'nijan poiyo'cco a'i tisupa can'jen'cho carpa can'jen'ttinga ccutsupa caña'jeñi moe'fa Moisés tsa carpanga ca'niña'ngae. ⁹Tsa'caen Moisés tse'ttinga japa ca'ni'ninda tsu Chiga unjimba'cco andepa tse'ttinga duse tsa carpanga can'jen'ttini. Tsa'caen duse'ni tsu Na'su Chigaja Moisésnga afa'je. ¹⁰Aindecuja maqui tsa'caen unjimba'cco ande dusesi atte'ta tisupa carpanga can'jen'ttinga ccaru dyaipa Chigama ñajan'fa.

¹¹Nane Chigaja Moisési'ccu cambajunaccu tisu amigoma'caen condasecco'je. Tsa'caen condase nanimba Moisésja canqueni ji'je. Tsa'ma tisema shondo'su Josué, tsa pushe me'choa Nun dutssi'yēja, minga'ni'qqe joqqitssi'jembi tsa carpa tsa'o'ye.

Chiga tise ñotssiam canjaen'cho

¹²Moisésja Na'su Chiganga su:

—Que canjan, que qui manda ña va aindecuma angacañe. Tsa'ma condambi qui majama ñai'ccu moeña'chove. Toya'caen qui su ñama ñotssie

in'jamba atesu ñajan que in'janquia'caen tsoña'chove. ¹³Nane ñoa'me que su'cho tsa'camajan que asi'ttaemba in'jan'choma ñanga canjaenjan cuintsu ñajan que suquia'caen tsoña'chove atesupa toya quei'ccu jacan qqen injan'jeñe. Ñotsse in'janjan va aindeccuja que aindeccu tsu.

¹⁴Tsonsi Na'suja su:

—Ñañi gi quema fuitepa toya'caen ñofaen'jeña.

¹⁵Tsa'caen susi Moisésja su:

—Tsa'caen que ingi'ccu jacañambi'ta ingima va'ttie somboembe canjan.

¹⁶Nane tsa'caen que fitecambian'da gi faesu aindeccui'ccu fae'ngatssia've da'faya. Tsa'ma que ingi'ccu fae'ngae jacamba fite'yi'ta gi in'jan'fa ingija que aindeccu'fa toya'caen que ingima ñotsse in'jan'chove'qqe.

¹⁷Tsonsi Na'su Chigaja su:

—Tsa que su'chomanda gi tsa'caen tsoña. Ñoa'me quema ñotsse in'jamba que ña suquia'caen tsoña'chove'qqe in'jamba gi tsa'caen tsoña.

¹⁸Na'su tsa'caen susi Moisésja inajamba su:

—¡Antteja ña que ñotssiam aatteye!

¹⁹Tsa'ma Na'su Chigaja su:

—Pa'cco ña ñotssiam a gi quenga canjaeña. Toya'caen ña inisema'qqe gi quenga condaya. Nane majama ña in'jan'da tsama gi mende'ye.

²⁰Tsa'ma gi su queja ña cambia'juma atteye oshambi qui. Nane majañi'qqe tsu ñama attepa ti'tsse canseye oshambi.

²¹Toya'caen Na'su Chigaja su:

—Que canjan, ñai'ccu pporotsse tsu patuvo'cho ccui cuintsu que tsani ccutsuye. ²²Nane ña ñotssiam aatiamba gi quema patuvo'cho changonga ca'niamba ña tivei'ccu piccoya tisu panshaña'ngae. ²³Tsomba ña tivema joquitssiansi qui ña sepacoma atteye oshaya. Tsa'ma ña cambia'juma atteya'bi qui.

Cuna patufin'dive manda'cho

34 ¹Na'su Chigaja Moisésnga su:

—Ja'ñojan queyi patuma chattupa ñoñajan dos patufin'dive tayosia'cantsse. Tsonsi gi ña tsanga tevaeña que ttova u'cca'chonga afapa tevaenquia'cantsse. ²Toya'caen tisuma ñoñajan tu'i sinte'yi Sinaí ccotta'cconga ansundeya'chove. Ansundepa ña tansin'choni can'jen'chonga catseja. ³Majañi'qqe que'i'ccu ansunde'masia tsu. Ni majañi'qqe pa'cco ccotta'ccoma can'ma'sia tsu. Ni oveja, vaura'qqe tsa ccotta'cco pporotsse shoshovima an'jen'masia tsu.

⁴Tsama pañamba Moisésja patuma chattupa tayosia'cantsse ñoña. Ccaqui a'ta sinte'yi jangipa tsa dos patufin'dive ñoña'choma isupa Sinaí ccotta'cconga ansunde Na'su Chiga tisema mandaquia'caen. ⁵Tsonsi Na'su Chigaja unjimba'coi'ccu andepa tseni Moisés'i'ccu can'jen. Tsa'caen can'jemba tisu inisema conda. ⁶Nane Moisés can'jen'tti'ye panshamba quian'me afapa qqen su:

—¡Na'su Chiga gi! ¡Na'su Chiga gi! ¡Ñotsse in'jamba mendeye'su Chiga gi! ¡Junde iyicca'ye'ma'sia toya'caen ñoa'me a'tatsse injancho'cho Chiga gi! ⁷Nane mil omba'su dutssiyendecunga gi antte'beyi tsangae ñotsse in'jamba tise'pa egae tsincon'choma joquitssiamba shacama'qqe ccuchaya. Tsa'ma ñama chi'gapa egae tsincon'sumbe injama'choma somboemba tise dushundecumbe, tsambe du'shumbe dushundecumbe toya'caen tsambe dushundecumbe injama'choma gi somboeña.

⁸Tse'faei'ccuyi Moisésja andenga puntssan ccuipa Na'su Chigama iñajamba ⁹qqen su:

—¡Na'su! ¡Na'su! Ñoa'metsse que ñama in'jan'da ingima angacanján. Va aindecuta tsu ñoa'me injiengembitssi'fa. Tsa'ma ingi egae tsincon'choma aqqe'papa ingija quembe'fa qqen injan'jenjan.

Ccase injancco'faya'chove afa'cho

¹⁰Na'su Chigaja su:

“Ñotsse paña'faja. Ja'ño gi poiyyi'cco a'i fae'ngae injancco'faya'chove tson. Taya'caen osha'cho camboenitssia'ma gi que'inga canjaeña. Nane ni mani'su ande'suyi'qqe tsu tsa'cantssia've tson'fambi. Tsa'caen tsonsi tsu poiyyi'cco cca'isundeccu mani que'i tise'pama cachui'ninda atte'faya Na'su ma'caen oshapa tson'choma. Nane ña que'i'ccu tson'choja camboenitssia tsu.

¹¹“Ja'ño ña que'inga manda'choma ñotsse tson'faja. Ña gi amoreondeccu, cananeondeccu, hititandeccu, ferezeondeccu, heveondeccu toya'caen jebuseondeccuma'qqe joquitssiamba tsa andema que'inga afeya.

¹²“Taya'caen tseni ca'nimba tsendeccu'ccu fae'ngae injancco'fajama, in'jamba'qqe vacho'va'caen zuccosa'ne. ¹³Tsa'cansi tise'pa chigandecunga oque oraen'jen'ttima osuiamba pa'cco tseni ccutsu'cho tise'pa iñajan'jen'cho patu, toya'caen Asera chiga quini'ccoma'qqe metsse cati'faja.

¹⁴“Faesu chiganga iñajan'fajama. Nane Na'suta tsu ñoa'me sepipa. Tise iniseta tsu Sepipa Chiga.

¹⁵“Tsa andeni cansesundeccu'ccu fae'ngae injancco'fajama, in'jamba'qqe tise'pa chiganga afeye iñajan'jemba que'ima'qqe ttu'sesi fae'ngae japa tise'pai'ccu tsa afe'cho aña'choma ansa'ne. ¹⁶Tsambi'ta tsendeccu tise'pa onquengendecuma que'i dutssiyendecunga anttesi in'jamba'qqe tise'pa chiganga iñajañe egae tson'jemba que'i dutssiyendecuma'qqe tsa'caen in'jaensi egae tson'fasa'ne.

¹⁷“Taya'caen minga'ni'qqe que'ija jongoesuma tssutssiamba ñoñaqqe'su chigave ñoña'fajama.

Poi canque'fa fiestaen'faya'cho

¹⁸“Cupana'cco me'choa pan fiestamajan fiestaen'jen'faja. Nane ña mandaquia'caen tsu siete a'ta pa'cco tsa cupana'cco me'choa panma an'faya'cho. Tsa'caen que'i tson'fa'cho ccovu tsu Abib. Nane tsa ccovuni qui que'ija Egiptone sombo'fa.

19“Poiyi'cco que'i aische dutssi'ye tsu ñambe. Tsa'caeni vaura, oveja toya'caen chivo isusi quitsayeta tsu tsa'qqe ñambe. 20Tsambi'pa boro aisheve isu'cho quitsayemanda tsu tsama afembe'yi oveja du'shu tsambi'ta chivo du'shuma ñanga afe'faya'cho. Tsa'ma tsa'caen afembi'ta qui boro du'shumbe catai'choma u'ccaya'cho. Toya'caen tsu tisu aische dutssi'yene afe'choma ñanga afe'faya'cho. Nane jongoesuve me'ccoja ñani ji'masia tsu.

21“Seis a'tayi tsu sema'faya'cho. Tsa'ma septimo a'taja ño'faya'cho a'ta tsu. Nane mapán jon'jemba tsambi'ta tai'je'a'qqe tsu anttepa ño'faya'cho.

22“Toya'caen Avujaqui'su fiesta, trigo aisheve nasi tai'cho'su fiesta, tai nanicho'su canque'fa pasa'cho fiestama'qqe fiestaen'faja.

23“Poiyi'cco tsandiendeccu tsu fae canque'fanga tres se Na'su Chiga tsa israendecumbe Chiganga catse'faya'cho. 24Ñã gi faesu andesundecuma joqqitssiamba tise'pa andema que'inga afe'ñaccaya. Tsa'cansi que'i poi canque'fanga tres se Na'su que'i Chiganga catseye japa tisu andeni can'jembi'ni'qqe tsu majañi'qqe que'i andema itsaya'bi.

25“Chiganga afe'cho aña'choma afe'je'ta tsambe anjampama fae'ngae afejama cupana'ccopa pani'ccu. Toya'caen Chiga fi'ttimbe panshan'cho injienge'cho aña'choma ccaquine antte'fajama.

26“Majan aisheve na'cho teta'cho ñotssiamã tsu Na'su que'i Chiga tsa'onga angaya'cho.

“Toya'caen chivo du'shuma tise mama chochoi'ccu sho'ccoen'fajama.”

Chiga manda'choma tevaen'cho

27Na'su Chigaja Moisésma su: “Va ñã su'choma tevaenjan. Nane va su'choja ñã quei'ccu toya'caen israendecui'ccu'qqe injancco'fa'chove su'cho tsu.”

28Tsa'caen susi Moisésja cuarenta a'ta pa'cco toya'caen cuarenta cose tseni ambitsse cu'imbitsse Na'su Chigai'ccu can'jen. Tseni tsu Na'su Chigaja patufin'dinga injancco'fa'chove manda'cho, tsa Diez Manda'choma tevaen.

29Omboe Moisésja tsa dos patufin'dinga manda'chove tevaen'choma isupa Sinaí ccotta'cco'ye ande. Tsa'ma tise Na'su Chigai'ccu afa'jesi tise cambia'ju chanjun'choma atesumbitsse ande. 30Tsa'caen Moisés cambia'ju chanjun'choma attepa Aarón toya'caen poiyi'cco israendeccu ño'a'me dyopa tisenga catse'fambi. 31Tsa'ma Moisésja Aarón toya'caen israendecuma ttu'se. Tsa'caen ttu'sesi Aarón toya'caen israel'su coenzandeccu'qqe tisenga bosì Moisésja tise'pai'ccu condase. 32Omboe poiyi'cco israendeccu catsesi Moisésja pa'cco Na'su Chiga Sinaí ccotta'cco'ye afapa manda'choma condase. 33Tsa'caen tsendecunga condase nanimba Moisésja tisu cambia'juma pañeroi'ccu picco.

34Moisésja Na'su Chigai'ccu afaye tsa carpanga ca'ninda tisu oppoen'cho pañeroma fetta tisu tsene somboya'ngae. Tsa'caen Na'sui'ccu condase nanimba israendecunga condase pa'cco Na'su Chiga mandapa su'choma. 35Tsama paña'jemba israendeccu Moisés cambia'ju

chanjun'choma atte'nijan ccase tisu pañeroi'ccu cambia'juma oppoen.
Tsa'caen tsu oppoen ccase Na'su Chigai'ccu afaye ca'niña'ngae.

Ño'faya'cho a'tane manda'cho

35 ¹Moisésja poiyi'cco israendeccuma boñamba qquen su: “Na'su Chiga tsu ñanga mandapa qquen tson'faya'chove su: ²Nane seis a'tayi tsu semaña'cho. Tsa'ma septimo a'ta tsu que'i Chigama ñajaña'cho a'ta. Tsequi a'ta tsu ñoa'metsse ño'faya'cho a'ta Na'su Chiga anttepa ño'fa'choma injan'jeñe. Majan tsequi a'ta sema'ninda tsu fi'ttiya'cho. ³Nane mani que'i canse'a'qqe ni si'ngeveyi'qqe oque'fajama tsequi ño'faya'cho a'ta.”

Chigai'ccu cachuicco'je'cho carpave ñoña'cho

Pa'cco que afe'cho tsu ña can'jeña'cho carpa tsa'ove naniña'cho. Tseni gi ñajan que'i'ccu can'jeña.

Va carpa tsa'omanda tsu ai'yembe battiya'chove naniña'cho tisupa mani jayipa ai'yembe battiaña'chove. Toya'caen tsayita qui ma'ttinga in'jan'da ai'yembe ccutsian'faya.

Tsa carpa tsa'o, toya'caen osha'cho tsani jincho'choma tsu ñoa'me ñotsse ñoñaña'cho ña agattopa mandaquia'caeni. Nane trece metro enttinge bia'su, cuatro metro enttinge attaja'su toya'caen cuatro metro enttinge sefa'su. Tsambe utufamajan mesai'ccu tsu ccutsu'chove ttuya'cho. Tsa'ma fae etticcu'chomajan sarupai'ccu tsu ttuya'cho cinco dyaipa'chove dyaiñamba. Tsefaya tsu sombo'tti.

Cuatroyije'ccu oppoen'cho tsa'o tsu. Nane o'tie oppoen'chota tsu totoa lino sarupa. Tsani tsu sefacconi'su shondosundequia'caen iroi'ccu uga'cho jin. Tsambe ombanga tsu chivo tosema otata'choma oppoen'fa. Tsambe ombanga oveja ttonoma cu'ave ojoemba setsaen'choma oppoen'fa. Ombanga ñoa'me anttepaveja ñotssia chhariccotssia ttonoma setsaen'choma oppoen'faya'cho.

Tsa carpa tsa'ota tsu dos cuartove ñoña'cho. Nane ttuccu enttingenga tsu cuatro cori'ccu onccan'cho dyaipa'chove dyaiñamba tsanga sarupai'ccu dusiamba ttu'cho, enttinge'su cuartove piccoye. Tsa enttingeni'su cuarto tsu ñoa'me Chigai'ccu cachuicco'je'cho cuarto.

Tseccuni tsu ccutsu ñotssia quini'ccoma ñoña'cho cafon. Tsa cafon tsu cori'ccu pa'ccoma oppoen'cho. Tsanga tsu manda'chove tevaen'cho patufin'dima ñoñamba an'bian'fa. Tsa cafonma picco'je'chota tsu pa'cco coriyiya'cho. Toya'caen tsanga tsu ñoñaña'cho dos sefacconi'su shondosia'caen corima ñoña'chove. Tsa sefacconi'su shondosundeccuve ñoña'chota tsu cambajunaccu ccaru dyaipa corima ñoña'cho piccofin'dima cambia tise'pa sanccopai'ccu tsa corima ñoña'cho piccofin'dima oppoencho'faya'cho. Tsa cafon tsu Chiga a'i'ccu injancco'fa'chove canjaen'cho cafon.

Chigama afa'su na'suja tsa piccofin'dinga tsu Chiganga afe'cho'su anjampai'ccu bitssaeña'cho cuintu ña mendeyepa aindeccu egae tsincon'choma joqqutssiañe. Nane tsambe omba'ye gi pa'cco ña in'jan'choma afapa israendeccuma manda'jeya.

Faesu cuarto, sombo'tti pporotsse jincho tsu Chiganga catse'je'cho cuarto. Tsa cuartombe tansinfanga tsu cori'ccu oppoen'cho mesama ccutsiaña'cho. Tsanga tsu doce panme ottaeña'cho; fae pan tsu fae israelnaccuve canjaen'cho. Nane tsa pan tsu doce Jacob dutssiyendeccuve canjaen'cho. Tsa cuartombe pavefa'su, mesa isevetsse, tsu corima ñoña'cho tuñoma setsaen'jen'choma ccutsiaña'cho.

Toya'caen Chigai'ccu cachuicco'je'cho cuartoma picco'je'cho sarupa jin'ttinga tsu Chiganga afe'je'chove corima ñoña'choma ccutsiaña'cho. Tsanga tsu ñome'bama oque'jeya'cho. Pa'cco tsa jincho'cho tsu Chiganga catse'jeya'cho cuartoni jinchoya'cho. Tsa cuartoma picco'cho tsu cinco cori'ccu onccan'cho dyaipa'chove dyaiñamba sarupai'ccu ttu'cho.

Toya'caen tsa carpambe atandundu'su sombo'tti jinfanga tsu rande Chiganga afeye oque'je'chove cu'a yoshavama ñoña'choma ccutsiaña'cho. Toya'caen tsambe pporotsse tsu cu'a yoshavama ñoña'cho bandeja randema ccutsiaña'cho cuintu tsanga Chigama afasundecuja tsa'ccuma on'boemba otishi'jeye.

Toya'caen carpa tsa'o, oque'je'cho, otishi'je'chombe utufama tsu sarupa ttuccuve ttuya'cho. Nane tsesuja cuarenta metro bia'su, veinte y ocho metro attaja'su, toya'caen dos metro sefa'suve tsu ttuya'cho. Tsa ttuccuta tsu sesenta dyaipa'chove dyaiña'chonga totoa sarupama dusian'choya. Toya'caen sombo'ttija cuatro dyaipa'chove dyaiña'chonga sarupama otata'choma dusiaña'cho. Nane Chigai'ccu cachuicco'je'cho carpa tsa'o'su sombo'tti toya'caen atandundu'su sombo'tti'qqe tsu chiga sombo'jefani jiña'cho.

Ñanda gi in'jan Aarón tise dutssiyendeccu Nadab, Abiú, Eleazar toya'caen Itamar cuintu ñama afasundecuve da'faye. Aarón tsu ñoa'me ñama afasundecumbe na'suya. Toya'caen qui ccaninga ondiccu'je ñoa'me ñotssiave anchomba tsendecunga ondiqquian'faya'cho. Nane tsa ondiccu'je tsu tise'paja Chigama afasundeccu qquen canjaeña.

Poi a'ta sinte tsu oveja quitsaye fae canqqe'fave an'bian'choma fi'ttiya'cho. Nane ñoa'me giya'tssiama tsu fi'ttipa ñanga afeya'cho. Tsa'su anjampama tasanga isupa tsu tsa oque'je'chombe utufanga bitssaeña'cho. Oque'je'chombe ombanga pa'cco oveja ai'voma oqueya'cho. Toya'caen tsu harina, yayapa, o'fa tsaja tsa'ccuma'qqe afeya'cho. Sime'qqe tsu tsa'cantsseyi afeya'cho. Nane sinte, sime'qqe tsu ña que'i'ccu can'jen qquen in'jamba oquepa afe'jeya'cho.

Poi sinte Aarón tuñoma ñoña'da tsu ñome'bama oqueya'cho. Toya'caen sime'qqe tsa'caeñi tsoña'cho.

Tsa'caen tsu Na'su Chigaja conda.

Cachuicco'je'ttima nani'cho

39 ³²Israendeccuja Chiga Quitsa Moisésnga condaquua'caeni pa'ccoma tsa'cantse ñoñamba Chigai'ccu cachuicco'je'cho carpama nani'fa.

Cachuicco'je'ttive ccutsian'cho

40 ¹⁶Nane Moisésja pa'ccoma Na'su Chiga tisenga mandaquua'caen nanitse tson. ¹⁷Tsa'caen tson nanisi tsu tise'pa Egiptone sombo'cho fae canque'fa pa'cco nepipa segundo canque'fave ashaen. Nane primer ccovu'su primer a'tanga tsu Chigai'ccu cachuicco'je'cho carpave ccutsian'fa. ¹⁸Tsequi a'ta Moisés ccutsiañe mandasi tsu ttuccu'su mesama ccutsiaña'chove o'tie ccuiña'fa. Ccuiña'ba tsanga ttuya'cho mesama ccutsiamba ottaen'fama ejjian'fa ancañe. Tsa'caen tsomba tsu etticcu'cho'su dyaiña'choma'qqe dyaiña'fa. ¹⁹Tsa'caen ñoñamba pa'cco ombanga tsu carpama oppoen'fa. Toya'caen tsambe ombanga chhariccotssia ttonoma oppoen'fa Na'su Chiga Moisésnga mandaquua'caen.

²⁰Pa'cco Chigai'ccu cachuicco'je'tti'su carpama ccutsiansi tsu Moisésja Chiga a'i'ccu injancco'fa'chove canjaen'cho cafonga ppiña Chiga manda'choma tevaen'cho patufin'dima. Tsama ppiña'ba tsu angaque'su quini'ccoma ejiamba corima ñoña'cho piccofin'di'ccu picco.

²¹Tsa'caen ñoñamba manda Chigai'ccu cachuicco'je'tti'su tsutopani'su quartonga ca'niañe. Ca'niamba tsu manda dusiañe tsa cuarto'su sarupa picco'je'choma. Toya'caen tsu Chiga a'i'ccu injancco'fa'chove canjaen'cho cafonma oppoen (majan cambia atesa'ne) Na'su Chiga mandaquua'caen.

²²Omboe tsu manda cuintsu cori mesama Chigai'ccu cachuicco'je'ttinga ccutsiañe picco'je'cho sarupambe pporotsse tsotefa'su tansinfanga.

²³Tsa mesa ombanga tsu panma tansintsse fae'ngatsse ccuiña Na'su can'jen'ttinga Na'su Chiga mandaquua'caen.

²⁴Toya'caen tsu cori tuño'ba ccutsian'jen'cho mesama isevetsse ccutsian. Tsama'qqe picco'je'cho sarupambe pporotsse tsotefa'su pavefanga. ²⁵Ccutsiamba tsu tuño'ba setsaen Na'su can'jen'ttinga Na'su Chiga mandaquua'caen.

²⁶Toya'caen tsu corima ñoña'cho oque oraen'jen'choma ccutsian Chigai'ccu cachuicco'je'ttinga. Tsama'qqe picco'je'cho sarupambe pporotsse ccutsian. ²⁷Ccutsiamba tsanga ñome'bama oque oraen Na'su Chiga mandaquua'caen.

²⁸Pa'cco tsama ca'niamba ccutsiansi tsu Moisésja picco'je'cho sarupama dusiañe manda carpa tsa'o sombo'ttinga. ²⁹Tsama dusiansi manda oque oraen'choma oque'je'chove ccutsiañe Chigai'ccu cachuicco'je'tti'su sombo'ttimbe tsotefanga. Tsanga tsu vaura, oveja toya'caen trigo afe'choma'qqe Na'su Chiga mandaquua'caen oque oraen'fa.

³⁰Toya'caen oque oraen'choma oque'je'cho Chigai'ccu cachuicco'je'tti'ccu enttingenga tsu osha'choma cashije'chove ñña'cho bandejama ccutsian. Ccutsiamba tsanga tsa'ccuma on'boen'fa. ³¹Tsa'suma tsu Moisés, Aarón toya'caen Aarón dutssiyendeccuja ichhoi'fa tise'pa tivema otishiye toya'caen tise'pa tsu'ttema cashiye. ³²Tsa'caen tsu tson'fa maqui Chigai'ccu cachuicco'je'ttinga ca'niñe toya'caen maqui oque'je'chonga catseye. Nane Na'su Chiga Moisésnga mandaquia'caen tsu tson'fa.

³³Osefa'poe Chigai'ccu cachuicco'je'tti toya'caen oque'je'chombe atandunduma shoquendi'e ttu'fa sarupa ttuccuve. Ttuccu sombo'ttive tsu sarupa picco'je'choma dusian'fa.

Chiga can'jen'cho unjimba'cco

³⁴Moisés osha'chove ññasi Chiga can'jen'cho unjimba'cco tsu Chigai'ccu cachuicco'je'ttima picco. Toya'caen tsu Na'su Chigambe ñotssija enttinge'su Chigai'ccu cachuicco'je'cho'su quartonga on'ba. ³⁵Tsa'caen piccopa Chiga ñotssiai'ccu Chigai'ccu cachuicco'je'cho'su quartonga on'basi Moisésja Chigai'ccu cachuicco'je'ttinga ca'niñe oshambi. ³⁶Tsa'camba unjimba'cco maqui Chigai'ccu cachuicco'je'tti'ye jangi'ninda tsu israendeccu'qque tise'pa carpama onccamba tsaiqui'ye tsui ja'fa. ³⁷Tsa'ma tsa unjimba'cco jangimbi'ninda tsu toe tise'pa carpani can'jen'fa. Can'jemba ronda'je'fa maqui a'ta unjimba'cco jangiya'ngae. ³⁸Nane tsa'caen tsu tson'fa poi israendeccu'su jacan'cho canque'fa. Poiyi'cco israendeccu tsu poi a'ta Na'su Chiga unjimba'ccoma atte'fa Chigai'ccu cachuicco'je'ttimbe ombama. Toya'caen tsu poi cose ombanga si'ngema atte'fa.